

Hewuraio

Anitâ yet Yesu yetgât dopyetŋe konohâk oap.

¹⁻² Yura lohimbi, Anitâ nanŋahât topŋe ekyongomune nâŋgâŋet. Anŋoân topŋe katmâ tâmbâlipnennŋe ikŋe topŋe nâŋgâm henŋenŋuŋetgât Anitâŋe ikŋe den poropeteliŋe yenŋât biwiyenŋan kalop. Biwiyenŋan katmu yâkŋe lohimbi ekyongonŋetâ nâŋgâwi. Poropeteliŋe den sâwi yakât bulâŋe yamâ Anitâŋe nanŋe hânŋângumu giop. Otmu nanŋahât topŋe yamâ yuwu. Embânâmbâek hân himbim ki kândikyotgop yapâek Anitâŋe nanŋe ombe bisinŋe orop biwiyetŋe konohâk otmâ hân himbim pitu me senŋe âlâlâ topŋe topŋe kândikuowot. Otmu senŋe âlâlâ kândikuowot ya nannŋe galemguâk sâm Âwânŋe sâm waŋop. Yawu gârâmâ nanŋe kârikŋe otmâ hân himbim me senŋe âlâlâ topŋe topŋe ya hohem tatmap. Otmu tatmâ yâhâwiop.

³ Otmu âwâ nan yâk yetgât topyetŋe yamâ dop konohâk oap. Yakât dop kum sâmune nâŋgâŋet. Sikopŋe pilâm denŋânân hâumu gilenŋ beleŋ sâmap dop yawuâk Anitâhât towatŋe Yesuhâlen tetemu ekbin. Otmu Âwânŋe nanŋahât nâŋgâm nen umam sâningiâkgât nanŋe hânân yuân ge nengât tosanennahât matŋe mem muop. Mumu hanguwi yamâ lohimbiŋe yâkât nâŋgâŋetâ yahalâkgât âwânŋe Anitâ manman ambonŋe mumuŋambâ mem yahalop. Yahatmâ himbimân yâhâmu âwânŋe Anitâ orop tawot.

Anitâ nanŋaŋe aŋelo kerek yengât kunyeŋe tatmap.

⁴ Anitâŋe nanŋe orop dop konohâk tawot yâkât nâŋgâmu yahalop. Yawu otbaŋgim aŋelo yamâ yâkât amutgen katyehop. Yakât topŋe yuwu. ⁵ Emelâhâmâ Anitâŋe den yuwu sâŋ nanŋe ekuop ya poropete âlâŋe kulemguop.

“Gâmâ nâhât nanne ombe bisine. Yawu gârâmâ yiwereŋe yu yakât topŋe sâŋ teterâ lohimbi kerekŋe ekmâ nâŋgâŋet sâŋ katgeksan.”

Yawu sâŋ ekuop. Otmu torokatmâ sâop.

“Nine nanne kambiamne”. Otmu yâku yawuâk “Awoŋne” sâop.

Anitâŋe den sâmu kulemguop yamâ aŋelo yengât ki sâop. Yesuhât nâŋgâm sâmu kulemguop.

⁶ Anitâhât nanŋe himbimânâk tatmâ irak hâŋgângumu hânân gewe sâŋ olop. Sâp yan Anitâŋe ikŋe nanŋahât aŋelolipŋaŋe nâŋgâŋetâ yahatmu haonmâ ârândâŋ mepaenŋetgât den ekyongop. Yawu otmu aŋelolipŋaŋe yâkât nâŋgâŋetâ yahalop. Otmu Anitâ nanŋaŋe aŋelo kerek yengât kunyeŋe tatmap. ⁷⁻⁸ Otmu aŋelo yengât topyeŋe yakât Anitâŋe yuwu sâŋ tetemu lok âlâŋe kulemguop.

“Nâŋe aŋelolipne hâŋgânyongomune yâkŋe in yawu laune lâumai. Otmu biatŋet sâmune gurâ biatnomaihât dop tap.”

Yawu sâop. Yâhâ ikŋe nanŋe tiŋâk yakârâmâ yuwu sâŋ tetemu lok âlâŋe kulemguop.

“O, Pato gikak lohimbilipge hilâm ârândâŋâk ti-hityeŋe otmâ yâhâmbisângât dop tap. Yâhâ

yu me ya otmâ tâpikguwuatgât dop âlâ ki tap.
 Âilongoâk tatmâ yâhâmbisân.

⁹ Otmu orotmeme bâleŋe otŋetâ yakât nâŋgârâ
 bâlemap. Yâhâ orotmeme âlepŋe otŋetâ
 yanâmâ yakât nâŋgârâ ârândâŋ otmap. Yawu
 gârâmâ gâŋe otmat yakât nâ Anitâ patohaŋe
 yakât nâŋgâmune ârândâŋ oap. Yakât otmâ
 gâ hâŋgâŋohomune ge lohimbi komotŋe
 komotŋe yeŋgât galem pato manbuat. Yawu
 manmâ mem dâiyekdâ gike orowâk heronŋe
 kakŋan manmâ yâhâmbisâi.”

¹⁰ Otmu den âlâ yuwu sâop.

“Pato, aŋgoânâk gâŋe hân himbim pitu me senŋe
 âlâlâ ya topŋe katmâ tuhuon.

¹¹⁻¹² Yawu gârâmâ senŋe âlâlâ topŋe topŋe
 tuhuon yamâ hâmbâi gulip otbuap. Pet
 sâŋgum mem haŋgalakmâ mansai yamâ
 hâreakmâ tâtuk sâwuap yakât dopŋeâk
 hân himbim yamâ hâmbâi gulip otmâ
 metewuap. Yâhâ gâŋeâmâ embâŋâmbâek
 tatmâ gaonŋak tatmâ gamat. Otmu yawuâk
 tatmâ yâhâmbisân. Otmu itâ hambuŋe me pet
 hâŋgiŋe yawuya pilâŋetâ tatmâ tâtuk sâmu
 âiŋe memai yakât dopŋeâk gâŋe sârâ hân
 himbim gulip otbuap. Gulip otmu yanâmâ
 yâhâpŋe sârâ âiŋe tetewuap.”

Yawu sâm ekuop. ¹³ Otmu Anitâŋe sâp âlâen
 yuwu sâm ekuop.

“Gâŋe nâhât hahit mem kinmâ yan kasalipge
 mem ge katyekbuat.”

Yawu sâop. Den ya nanŋe ekuop. Anelolipŋe ki
 ekyongop.

14 Anjelo yengârâmâ Anitâņe yuwu sâop. “Nâņe hângânyongomune hoņ banihinomai. Hoņ banihim gemâmâ nâhât komolipne yengât nângâm manman kârikņahât pat kuyiņgiwan ya yengât tihityeņe otnomai.” Yawu sâm hângânyongomu gewi. Yawu gârâmâ Anitâ ikņe nanņe yâkņeâmâ kerek yengât kunyeņe tatmap.

2

Anitâņe nanņe hângângumu kuwiknenehâkgât giop.

¹ Yakât otmâmâ nanņe hângângumu ge hohetnenņan manmâ gaop. Manmâ den sâop ya nângâmunņe bulâņe otmu biwinenņan katmâ lâum mannom. Ki lohotņe otmâ pilânom.

² Emelâk topņe katmâ Anitâņe aņelolipņe hângânyongomu tâmbâlipnenņe yengâlen ge den ya sâm tetem ekyongowi. Den ekyongowi yakât bulâņe teteop. Yâhâ lohimbi nombotņe den ya nângâņetâ gemu bet pilâwi yamâ Anitâņe in yawu yakât matņe yiņgiop.

³⁻⁴ Yawu gârâmâ sâp yiwerene yuâmâ Anitâņe ikņe nanņe hângângumu mem kuwiknenekbe sâm giop. Mem kuwiknenekbe sâm gem ikņe den pat bulâņe ya teteâkgât Yesu Kutdânenņe ikņahâk den ya sâm tetem eknongop. Eknongomâmâ Anitâņe ikņe nanņahât den yakât bulâņe lâuwuap yawu sâm kulem ki orotņe otminiop. Otmu ikņe engatņeâk otmâ Wâtgât mâmâņahât Heak hângângumu yâkât komolân gem heņgemnongom mâmâņe otningimu yakât bulâņe tetemu mewin. Otmu aņgoân Anitâņe otbaņgiwi yakât matņe yiņgiop. Umatņe

yawuya teteningimap sâm yakât Anitâhât nanŋe bulâŋe yawu sâm ya nâŋgâm biwinenŋaŋe mem yâhânôm. Ki lohotŋe otmâ pilânôm.

Yesuŋe dâinenekmâ manman kârikŋan katnenekmu manmâ yâhânôm.

⁵ Otmu lok nenŋahât sâwe. Anitâhât aŋelolipŋaŋe lohimbi nengât kunnenŋe mannomaihât yâkŋe ki ekyongop. Bia. Nanŋaŋe lohimbi nengât kunnenŋe pato otmâ tihitnenŋe galem otbisâpgât sâm kalop. ⁶ Yawu gârâmâ Anitâŋe yakât sâm lok âlâhât nâŋgân nâŋgânŋan den yuwu katmu kulemguop.

“O, Anitâ, gâhât nâŋgâmunŋe yahatmap. Nenâmâ lohimbi tâŋât. Yamâ gâŋe gâmâ nengât tepge nâŋgâm kunnenŋe tatmâ gamat ya nâŋgâmunŋe bimbi oap.

⁷ Otmu nenŋe aŋelo yeŋgât amutgen sâp tâlâwâk manmain. Yâhâ wahap topŋe topŋe kalon ya yeŋgât galemyeŋe otmâ mannom sâm yakât pat kuningion.

⁸ Yawu sâm pat kuningion yakât bulâŋe nengât nâŋgâŋetâ yahatbuapgât mem katnenekdâ ya galemयोगom yâhânôm.”

Den yawu tap. Yawu gârâmâ yakât bonŋe hâmbâi tetewuap. Sâp yiwereŋe yu nenŋe wahap topŋe topŋe yakât galem ki otmâ mansain. ⁹ Yawu gârâmâ nenŋe aŋelo yeŋgât amutgen mansain dop yawuâk Anitâŋe ikŋe eŋgatŋeâk otmâ Yesuŋe buku otningiâkgât hâŋgâŋgumu himbimâmbâ ge lok olop. Lok otmâ hânân manop sâp yanâmâ aŋelo yeŋgât amutgen manop. Yawu manmâ nengât sâm hâhiwin nâŋgâm muop. Mumu yanâmâ Âwâŋaŋe ekmâ, “Nanne kambiamne,” sâm

yan lohimbiŋe yâkât nâŋgâŋetâ yahalâkgât mu-
muŋambâ mem yahalop. Mem yahatmâ man-
man kârikŋe yakât amboŋe sâŋ katmu nengât
kunnanŋe otmâ tatmap. ¹⁰ Otmu âwâŋe Anitâŋe
emelâk embâŋân wahap topŋe topŋe kalop ya
mem hohem talâk sâŋ nanŋe âi waŋop. Âi waŋop
ya kerek tuhum meteop. Ya nâŋgâmu ârândâŋ
otmu yakât otmâmâ nenŋe mum hiliwahonmgât
dop ki tap. Yâkŋe dâinenekmâ manman kârikŋan
katnenekmu manmâ yâhânom.

¹¹ Bukulipne, bulâŋanâk Anitâŋe nanŋe
hâŋgâŋgumu ge tosa barak manop. Yawu manmâ
gam nengât tosanenŋe pilâningimu âwâŋe Anitâŋe
nine nanne baratne koko salek sâŋ menenekmu
mansain. Otmu Yesuŋe gurâ nengât yawuâk imi
garilipne sâmap. ¹² Yakât bulâŋe tetewuapgât
nâŋgâŋ Yesuŋe âwâŋe yuwu sâŋ ekuop.

“O, Anitâ, imi garilipnaŋe nâhâlen torokatmâ
mansai ya gâhât topge sâŋ tetem ekyon-
gowom. Otmu kiki meŋgihimune nâhâlen
torokatŋetâ orowâk mepaeheknom.”

Yawu sâŋ ekuop. ¹³ Otmu âlâmâ yuwu sâop.

“Nâŋe Anitâhâlen biwinanŋe kepeiman.”

Otmu âlâmâ yuwu sâop.

“Lohimbiŋe Anitâhâlen biwiyenŋe kepeimai
yâk yekmâ nine nan baralipne sâwuap. Otmu
nâmâ yâk yeŋgât kunyenŋe sâŋ katnekmu ya
galemyongomune orowâk mansain.”

Yawu sâop.

¹⁴ Otmu lohimbi nenŋeâmâ hânân yuân
mansain yakât otmâ Anitâŋe ikŋe nanŋe bulâŋe
Yesu himbimâmbâ hâŋgâŋgumu ge lohimbi nengât

tosahât otmâ muop. Otmu Anitâne mumuñambâ mem yahalop yan Satan Mumuhât Amboñe ya mem ge kalop. ¹⁵ Yawu gârâmâ nenâmâ mumuhât pat otmâ mansain nâñgâm gorâ kakñan manmâ gawin. Otmu yawuâk torokatmâ ki mannehât Yesuñe manman kârikñahât mâtâp mem teteningiop. ¹⁶ Otmu Anitâne añelolipñe yeñgât nâñgâm Yesu ki hâñgâñguop. Yâhâmâ nengât sâm yâk hâñgâñgumu giop. Otmu tâmbânenñe Awarahamñe Anitâhâlen biwiñeñe kepeim manop nengu yawuâk kepeim manbin. Yakât otmâ tihitnenñe otbe sâm giop. ¹⁷ Otmu Anitâne wawaenenekmâ tosanenñe pilâningiwe sâm âi sâm wañop. Âi sâm wañop ya memu ârândâñ olâkgât himbimâmbâ ge lok otmâ manop. Otmu sâp yan lohimbi nengât biwi nâñgân nâñgânnenñe ya mem manop. ¹⁸ Otmu nenñe lohotñe otnehât Satanñe perâkñe topñe topñe kâitnongomap yawuâk añgoân yâk kâitguop. Kâitgumu ki lohotñe otmu pilâm ba ariop. Yawu gârâmâ nenñe lohotñe otnehât Satanñe kâitnongomap yan Yesuñe mâmâñe otningimu yâkât wâtñan kinmunñe mem ge katnenekbe sâm pâpgumap.

3

Yesuñe Mosehât kunñe tatmap.

¹ Bukulipne, yuwu sâmune nâñgâñet. Anitâne nanñe Yesu hâñgâñgumu hânân yu giop. Otmu Anitâne mem dâinenekmu Yesuhâlen biwi nâñgân nâñgânnenñeñe kepeim konohâk otmâ mansain. Yakât otmâ yâkñe mâtâp mem kulet sâningim âwâñe Anitâhâlen âwurem yâhâ tatmâ nengât

sâm âwâñe ulitgumap. ² Otmu Moseñe Isirae lohimbi yengât galem pato man sâm Anitâñe âi wañop. Âi wañop ya biwiñañe mem tuhum manmâ gaop. Yakât dopñeâk Yesuñe nengât kunnenñe otmâ manbuapgât Anitâñe âi sâm wañop ya tem lâuwangim manop. ³ Yawu gârâmâ Mose otmu Yesu yetgât topyetñe ikñiâk ikñiâk tap yakât nâñgâñetâ keterahâkgât den âlâen hâum sâmunen nâñgâñet. Lok âlâñe emet pato ikñiâk tuhumu bukulpñañe ekñetâ âlepñe nandorñe otmu yâkât nâñgâñetâ yahatmu mepaemai. Yakât dopñeâk Yesuhât komolipñe, emelâk Mose otmu tâmbâlipnenñe manmâ gawi, otmu âun nen yu mansain, otmu hâmbâi lohimbi tetem mannomai nen kerek ikñak menenekmâ kunnenñe tatbuap. Yawu tatmu nenñe yâkât nâñgâmunñe yahatmu mepaem yâhâmbisâin. ⁴ Yawu gârâmâ den âlâen hâum yuwu sâwe. Emet yañe ikñak in ki gam yâhâ kinmap. Nenñe kât, nak me senñe âlâlâ yañe mem emet tuhomain. Dop yawuâk Anitâñe yu ya topñe topñe kalop. Nenñe ya ekmâ yanâmâ Anitâhât bât tosa sâm ekmâ nâñgâmain. ⁵ Otmu Mose yâhâmâ Anitâhât den lâum hoñ bawañgim manop. Hoñ bawañgim manmâ yu me ya gâmâlâk tetewuap yakât sâm tetem Isirae lohimbi ekyongom manop. ⁶ Yâhâ Yesu Anitâhât nanñañe nen hârok nengât kunnenñe tatmâ tihitnenñe otmap. Otmu yâkñak Mosehât gurâ kunñe tatmap. Otmu Anitâñe Yesuhât pat kuningiop ya mene sâm Yesuhâlen biwinenñañe kepeim mannom otmuâmâ pat yakât bulâñe ningimu mem Yesu orop tatmâ yâhâmbisâin.

Tâmbâlipyenjaŋe manman sânduhân ki yâhâwi.

⁷ Yawuhât Anitâŋe Wâtgât mâmâŋahât Heak hânġângumu ge lok âlâ ekumu den yuwu kulemguop.

⁸⁻¹¹ “Anġoân yambu 40 yakât biwiŋan, tâmbâlipyenjaŋe lok ki manmaiângen ari manmâ kunyeŋe kârikŋe otmu nâhât den kum manbi. Yawu otŋetâ yâk yeŋgât senyeŋe hâreahâkgât kulem topŋe topŋe memune ekbi. Kulem yawu memune ekmâ nâhât topne nânġâwi yamâ biwiyenjaŋe pâlâmŋe otmu manbi. Otmu nâhât den ya nânġâm bet pilâm iliwetmâ manmâ gawi. Tâmbâlipyenjaŋe manman sânduhân ari mannomaihât nânġâm, nâŋe Awarahamgât pat kuwaŋgiwan. Yamâ nâŋe den ekyongowan ya ki lâuwi. Yakât otmâ kuk otyiŋim tâmbâlipyenjaŋe nâhâlen torokatmâ manman sânduhân ki mannomaihât sâm hâreyiŋgiwan. Yawu otyiŋimune hâhiwin kakŋan manminiwi. Yeŋe sâp yiwerenŋe yuâmâ yakât nânġâm nâhât den tem lâunihim biwiyenŋe ki pâlâmŋe otmu mannomai. Yawu mannomai otmuâmâ nâhâlen torokatmâ manman sânduhân mannomai.” Yawu sâop.

¹² Bukulipne, yeŋe den yu sâlikum topŋe nânġâm heŋgeŋgunomai. Yen yawuâk biwiyenŋe orotok sâmu yan manman amboŋe Anitâ ya pilâŋetâ biwiyenŋe bâlemagât yen galemahom mannomai. ¹³ Otmu biwiyenŋe pâlâmŋe otmapgât orotmemeyenŋe bâleŋe bet pilâm Anitâhât den tem lâum haonmâ ârândânŋe bukulipyenŋe orop mem hewewenŋe tuhuakmâ tânahom mannomai. ¹⁴ Yeŋe

biwiyenê Kiristohâlen katnetâ kârikneâk kinmâ gaop yawuâk kinmu manmâ yâhânomai. Yawu mannetâ yanâmâ Kiristone manman kâriknan mem katyekmu yâk orop tاتمâ yâhâmbisâi. ¹⁵ Bukulipyenê orop mem hewewenê tuhuakmâ Anitânê den sâmu kulempuop ya nângâm mem mete tuhunomai. Den ya yawu tap.

“Tâmbâlipyenê lok ki manmaiângen ari manmâ kunyenê kârikne otmâ nâhât den kum manbi. Yawu otmâ biwiyenê pâlâmne otmu manbi. Yakât otmâ tâmbâlipyenê manman sânduhân ki mannomaihât sâm hâreyinjiwan. Yenê yakât nângâm nâhât den tem lâunihim biwiyenê ki pâlâmne otmu mannomai.”

Den kulempuop ya yawu tap.

¹⁶ Yakât yuwu sâmune nângânet. Lohimbi girawuyanê Anitâhât den nângâwi yamâ biwiyenê pâlâmne otmu manbi? Yamâ Isirae lohimbi Mosenê angoân dâiyekmu Aihita hân pilâm lok ki manmaiângen ari manbi ya. ¹⁷⁻¹⁸ Otmu Anitânê lohimbi girawuya yengât yuwu sâm hâreyinjiop?

“Nânê kuk otyinjimune nâhâlen ki torokatmâ manman sânduhân mannomai.”

Yawu sâm hâreyinjiop yamâ lohimbi girawuya yengât sâop? Yamâ yuwuhât sâop. Tâmbâlipnennê lok ki manmaiângen ari mannetâ yambu 40 pesuk sâop. Lok ki manmaiângen manbi yan Anitâhât den nângânetâ gemu bet pilâwi yakât tosanê meyekmu hiliwahom hâmeyenê gulip olop. ¹⁹ Yakât topnê yamâ yuwu nangain. Nengât tâmbâlipnennê Anitâhâlen biwi nângân nângânyenê ki kepeim manbi. Topnê yakât otmâ Anitânê kuk otyinjimu manman sânduhân ki

manmâ gawi. Yawu gârâmâ yeje tâmbâlipnenñaje otbi yawuâk otmaihât biwiyenje galemahom henğengum manmâ yâhânomai.

4

Anitâje mem manman sânduhân katnenek-buapğât mâtap tap.

¹ Anitâje biwinnenje mem huruñ pilâmu sânduhânâk manmâ yâhânom yakât sâm kalop. Yakât otmâ Anitâ nenekmu ki ârândân otmapğât biwinnenje galemahom denje biwinnenñan katmâ tiñâk lâum manmâ yâhânom. ² Emelâhâmâ tâmbâlipnenñaje Anitâhât den pat âlepñe ya nângâwi yamâ yâkâlen biwi nângân nângânyenñaje ki kepeim manbi. Yakât otmâ yâkñe tatmap yan ki mem dâiyekmu yâhâwi. Yan ki yâhâwi yamâ biwiyenñaje ki huruñ sâmu tatmâ yâhâwi. Nen gurâ yawuâk Anitâhât den pat âlepñe ya nângâwin. Yawu gârâmâ tâmbâlipnenñaje otñetâ bâleop yawu otmaingât biwi nângân nângânnenñaje Anitâhâlenâk kepeim lañe lâuwangim mannom. ³⁻⁴ Yawu gârâmâ nenâmâ yâkâlenâk biwi nângân nângânnenñaje kepeim mansain. Yawu manmâ yâhâmunñe biwinnenje sânduk sâwuap. Yâhâ tâmbâlipnenñeâmâ yawu ki otbi. Yakât otmâ Anitâje den sâm hâreyiñgiop ya yuwu tap.

“Nâje den ekyongowan ya ki lâuwi. Yakât otmâ nâhâlen torokatmâ manman sânduhân ki mannomaihât sâm hâreyiñgiwan.”

Anitâje in tatmâ nângâmap yakât topñe teteâkgât lok âlâñe den yuwu kulemguop.

“Anitâŋe hân himbim kândikyotgom âliwahap topŋe topŋe katmâ arimu hilâm nombolân konok pesuk sâop. Yakât kakŋanâmâ in tatmâ nâŋgâop.”

Otmu manman sânduhân orowâk tatmâ nâŋgâne sâm yakât Anitâŋe tâmbâlipnenŋe dâiyehop. Dâiyekmuâmâ denŋe nâŋgâŋetâ gemu betbangim yakât bulâŋe ki mewi. ⁵ Yakât otmâ Anitâŋe den yuwu sâop.

“Nâŋe den ekyongowan ya ki lâuwi. Yakât otmâ nâhâlen torokatmâ manman sânduhân ki mannomaihât sâm hâreyiŋgiwan.”

Anitâŋe yawu sâm hâreyiŋgiop. ⁶ Yâhâ tâmbâlipnenŋe den pat âlepŋe ya nâŋgâŋetâ gemu ki lâuwi. Yakât otmâmâ manman sânduhân ki yâhâwi. Yâhâ nengâlen gâtŋe âlâ me âlâŋe manman sânduhân yâhâ Anitâ orop manmâ yâhânomgât dop tap. Yawu gârâmâ nenŋe yâkâlen biwi nâŋgân nâŋgânnenŋe kepeim den pat âlepŋe ya nâŋgâm lâum mannom yanâmâ hâmbâi Anitâŋe dâinenekmâ mannom sânduhân katnenekmu manmâ yâhâmbisâin. ⁷ Yakât bulâŋe menomgât mâtâp tap yakât topŋe yuwu. Tâmbâlipnenŋe manman sânduhân ki manbiŋe hâhiwin kakŋan manmâ gawi. Yâhâ yapâ torokatmâ lohimbi tetem gawiŋe gurâ dop yawuâk manmâ gawi. Yâhâ tetem gaŋetâ gaŋetâ lok pato âlâ, kutŋe Dawiti sâm, yâk teteop. Yawu gârâmâ Anitâŋe Dawiti den yuwu ekumu kulenguop.

“Yeŋe sâp yiwerenŋe yuâmâ nâhât den tem lâunihim biwiyeŋe ki pâlâmŋe otmu mannomai.”

Dawitiŋe yawu sâm ekyongop yamâ aŋgoân

tâmbâlipnennaje kunyenje kâriknje otmâ Anitâhât den kuwi dop yawuâk otbi.

⁸ Otmu embânjan angoân Anitâhât den kuwi yakât âlâ torokatmâ sâwe. Emelâk Mose mumu lok âlâ, kutnje Yosua, yâkne Mosehât gewâknan kinmâ tâmbâlipnenne ya meyekmu hân âlâ, kutnje Kanan, yan ari manbi. Yâhâ Yosuañe manop sâp yanâk manman sânduhân manñet sâm Anitâñe katyehop mâne yakât kaknan Dawiti manop sâp yan “manman sânduhân mannomai” ki sâm ekyongombâp. ⁹⁻¹⁰ Yawu gârâmâ sâp yiwerenje yu nenne manman sânduhân manmâ yâhâmbisâingât dop tap. Otmu embânjan Anitâñe hân himbim kândikyotgom âliwahap topñe topñe kalop yakât kaknan in tatmâ nângâop. Dop yawuâk nengu manmâ yâhâmunñe Anitâñe sâop ya bulâñe tetemu yâkâlen torokatmunñe ikne orop tatmâ nângânom. ¹¹ Yakât nângâm yâkâlen biwinenñaje tiñâk kepeim manmâ yâhânom. Yawu otmunñe manman sânduhân katnenekmu ikne orop tatmâ yâhâmbisâin.

Anitâhât denñe nângâmunñe biwinenñan hâumu topnenñe mem tetemap.

¹²⁻¹³ Bukulipne, Anitâñe sâmu den kulemgawi ya wonân dop sâwe. Nehemân hâum kinmâ sâwe. Nehemñe lok kambiamñan memap yakât dopñeâk Anitâhât denñe nângâmunñe biwinenñan hâum topnenñe mem tetemap. Otmu ikne senñan misinguraknomgât dop âlâ ki tap. Nenne teteknan kinmunñe biwi nângân nângânnenñe kerek ekmâ nângâmap. Ya ekmâ nângâmâmâ biwinenñahât topñe sâm tetewuap yakât biwi

nângân nângânnenje galemguakmâ denje lâum mannom.

Yesuje nengât sâm Anitâ ulitgumap.

¹⁴⁻¹⁵ Otmu nen Satanje mem lohotje tuhunenekbe sâm nengâlen âi memap. Yâhâ Yesuje hânân ge manmâ gaop yan Satanje yawuâk yâk mem lohotje tuhuwe sâm nep miop. Yawu otmu ki otmâ tâpikguop. Yâkne kârikne manmâ Satan mem ge kalop. Yawu gârâmâ nenje Kutdânenje Yesu, Anitâ nannjahât denje lâum mannom. Yawu otmâ manmunje yâkne Anitâ orop tatmâ âwâñaje tepje nângâningim umam sâningiâkgât ulitgumap. ¹⁶ Yawu gârâmâ Satanje mem ge katnenekbe sâm otbuawân lohotje otmaingât Anitâ ulitgumunje mâmâñe otningiwuap. Yâhâ otmunje bâlewuap otmuâmâ ya sâm tetem ekum yâkâlen biwinenñaje kepeimunje kaok nângâningim tosanenje pilâningiwuap.

5

Anitâñe tosayeñe pilâyingiâkgât hotom uwanjiminiwi.

¹ Bukulipne, hotom uminiwi yengât kunje manop yâkât topje ekyongomune nângâñet. Anitâñe ikne nângân nângânñe biwinenñan katmu lok âlâ nenje hohetnenñambâ mem tetewin. Mem tetemunje Anitâñe tosanenje pilâningiâkgât lok yañe yâkât senñan kinmâ hotom uminiop. ² Otmu lok ya orowâk Satanje perâkne topje topje kâitnongomu otmunje bâlem gaop. Yakât otmâmâ nenje Anitâhât den ya lâum hâum pâpguwin yan

yâkņe tepņe nâņgâningim lohotņan otningiminiop.
³ Yawu gârâmâ ikņe orotmeme bâleņe otmu nengât orotmemenenņe bâleņe yakât tosa Anitâņe pilâningiâkgât hotom uwaņgim manmâ gaop.
⁴ Yâhâ ikņe nâņgân nâņgânân âi ya ki miop. Anitâņe topņe katmâ lok âlâ, kutņe Aron, yaņe hotom uyiņgimu tosayeņe pilâyiņgiâkgât âi ya sâm waņop. Topņe kalop yapâek manmâ gawi yamâ hotom u u lok ya Anitâņe ikņahâk mem sâlipyongom âi ya yiņgim gaop.

Yesuņe nen sârerenenekmâ muop.

⁵ Otmu yawuâk Kiristoņe ikņe enгатņeâk ki watmâ olop. Anitâņe âi ya sâm waņmâ hâņgângumu giop. Yâhâ emelâk ki giop yan Anitâņe den yuwu sâm ekuop ya lok âlâņe kulemguoop. Den ya yuwu tap.

“Gâmâ nanne ombe bisine. Yawu gârâmâ yi-wereņe yu yakât topņe sâm teterâ lohimbî kerekņe ya ekmâ nâņgâņet sâm yakât katgek-san.” Yawu sâop.

⁶ Yawu gârâmâ Anitâņe den âlâ yuwu sâm nanņe ekuop ya lok yaņe kulemguoop.

“Anģoân lok âlâ, kutņe Melekiserek sâm, yâkņe lohimbî yenģât tosayeņahât sâm hotom unihîwuapgât âi sâm waņmune mem gaop. Yawu gârâmâ gâņe âi ya mem torokat sâm gihimune tuhūm yâhâwuat.” Yawu sâm nanņe ekuop.

⁷ Yawu otmâmâ Yesuņe huruņ huruņ manmâ âwâņahât tem lâuwaņgim âi ya tuhūm manop. Otmu âwâņe mumuhât mâtâwâmbâ membuapgât dop tatbaņgiop ya nâņgâop. Yâkņe ya nâņgâm yâkâlen biwiņe kepeim yapâ

menekbuap nângâm isem ulitguop. Otmu âwâñahâlen biwiñaje kepeim manop yakât otmâ nângâwanjim mumuñambâ mem yahalop. ⁸ Yâhâ Yesuñe yuwu sâm ki ulitguop. “Nâmâ gâhât nange bulâñe mansan. Yakât otmâ umatñe âlâlâ nâhâlen tetenihiwuap yamâ sârâ biatbuap,” yawu sâm ki ulitguop. Yawu gârâmâ sât gum manmâ âwâñaje âi sâm wañop ya lâum lohotñe ki olop. ⁹ Yawu otmâ âi ya biwiñaje tiñâk mem manmu âwâñaje ekmu ârândâñ olop. Yakât otmâ yâkâlen biwinenñaje kepeim tem lâuwanjim manmunñe manman kârikñan katnenekbuapgât mâtâp teteop. ¹⁰ Anitâñe emelâk Melekiserek âi sâm wañmu mem manop. Âi yawuâk ikñe nanñe tâñ tâñ ya wañmu mem yâhâwuap.

Nenñeâmâ lepat nângân nângânân ki watmâ mannom.

¹¹ Bukulipne, yuwu sâmunne nângâñet. Nâñe Yesuhât topñe ya kerehâk sâm kusânâmâ ekyongowe sâm oan. Yamâ nângân nângânñe umatñe oap yakât otmâ ihilâk ekyongomune nângâñetâ ki keterakbuap. ¹² Yâhâ den yan yuâmâ emelâk ekyongowin yamâ yene nângâm heñgeñguwi mâne sâp yiwerenñe yu bukulipñe kâsikum yingimbâi.

Yamâ yene Yesuhât topñe nângâm pâpñuwi yakât nângâmune bâleap. Yakât otmâmâ lok âlâñe yâhâñe den kâsikum yingiwuapgât dopñe tap. Yengât topñeâmâ yuwu. Yengât nângân nângân yamâ lepat nângân nângân. Lohimbi papato yengât nângân nângân yawuya nângâwi mâne den yan yukât topñe âlepñe nângâm metembâi.

Yawu gârâmâ topyeŋe teteâkgât den âlâen hâum sâmunne nângâŋet. Leparâmâ sot nem âkâm yingimunŋe nemai. Yâhâ sot kândâkdâek ki nemai. Yeŋe Yesuhât komolân torokatbi yamâ ŋaŋa ya yeŋgât dop oai. Yamâ girawu otmâmâ lepatŋe nem âkâm yingimunŋe nemai yawuâk nemai? Yakât yeŋe topŋe girawu otmâmâ Yesuhât topŋe ya topŋambâek ki nângâm heŋgeŋguai? Yeŋe sot kândâkdâek nemai mâneâmâ Yesuhât topŋe ya nângâm heŋgeŋgumbâi. ¹³ Yamâ yeŋe lepalân manmâ orotmeme kiŋgoŋ me orotmeme âlepŋe yâhâp yâhâp ya ekmâmâ mem kiwilim topŋe nângânomaiahât dop ki tap. Yamâ otmâ tâpikguai.

¹⁴ Otmu torokatmâ den âlâen hâum sâwe. Lepat yamâ gâmâlâk papato otŋetâ sot kândâkdâek yingimunŋe nemai. Dop yawuâk lohimbî nombotŋaŋe nângân nângânyeŋe keterakmu Yesuhât topŋe ya ekmâ nângâm denŋe lâum manmâ gainŋe orotmeme âlepŋe me bâleŋe ya ekmâ kiwilim mansai. Lohimbî yawuya yeŋgât nângân nângânyeŋe me manmanyenŋe ya ekmâ nângâmune âlepŋe nanŋe otmap.

6

Anitâŋe nenekmâ ârândân olâkgât biwinenŋe yâkâlen katmâ mannom.

¹ Yakât otmâ den yu yâhâpŋe ki ekyongowe. Anitâ nenekmu ârândân olâkgât nenŋe orotmemenenŋe kiŋgoŋ otbîn ya bet pilâm sâm tetemâmâ yâkâlen biwi nângân nângânnenŋe katbîn. Otmuâmâ yakât topŋe yâhâpŋe ki ekyongowe. ² Otmu âlâmâ yuwu. Toen mem

katnenekbi yakât topņe ki sâ̄m ekyongowe. Me nenņe kunyeņan mem kuratgum mem kârikņe tuhuyekbin, me mumuņambâ yahatnom, me sâp patoen biwi nâņgân nâņgânnenņahât topņe ekmâ ikņiâk ikņiâk matņe ningiwuap yakât topņe gurâ yâhâpņe ki sâ̄m ekyongowe. Emelâk nâņgâm metembâihât. ³ Otmu Anitâņe biwiyeņe mem kusân̄mâ mâmâņe otnihimu yakât den âlâ âiņe torokatmâ ekyongowehât naņgan. Yâhâ yiwerene yuâmâ den umatņe tap yakât sâ̄mune nâņgâņet.

⁴⁻⁵ Lohimbi nombotņe Kiristohât den pat âlepņe nâņgâwi yan yâkât topņe nâņgâm heņgenġum biwiyeņe yâkâlen katņetâmâ himbingât pat kuyiņgimu mansai. Yawu otmâ Anitâņe Wâtġât mâmâņahât Heak hâņgâņgumu ge biwiyenān tatmâ mâmâņe otyiņgimap. ⁶ Yawu ġârâmâ yakât kakņan Kiristohât hâkâņ otmâ betgum manņetâ biwiyeņe pâlâmņe otbuap. Otmu Anitâ nanņeņe nengât sâ̄m muop yakât nâņgâņetâ tâņât otbuap. Yawu nâņgâm manmâ yâhânomaiņe Parisaio Sarukaio yâkņe sâņetâ Yesu mem howanân kum kânâņgâwi yâk yeņġât dop otmâ yakât matņe bâleņe menomai. Nâņgân nâņgân yawuya nâņgâm manmâ yâhânomai yakât otmâ biwi nâņgân nâņgânyeņe yâkâlen yâhâpņe katnomaihât dop âlâ ki tap.

⁷ Yakât nâņgâņetâ keterahâġġât den âlâen hâum sâ̄mune nâņgâņet. Hân ambolipņe nep kâmetmâ pilâņetâ iop. Imu yan ġelâk ġemu hân toņe orop yapâ ġâtņeņe hunsambe teteop. Otmu yapâ sot hâwurum um nem âlepņan manmâ ġawi. Yakât dopņeâk lohimbi nombotņe Anitâhât den ya

nângâm biwiyenjan katmâ yâkât wâtņan kinņetâ yâkņe mâmâņe otyiņgimu orotmeme âlepņeâk ot-mai. ⁸ Yâhâ âlâ torokatmâ sâwe. Nep ya kâmetmâ pilâņetâ imu yan hewukņane lâum kurihimu lan-guop yamâ orok sâop. Yakât dopņeâk lohimbi nombotņane aņgoân biwiyene Kiristohâlen kat-mai. Yakât kakņan Anitâhât den ya nâņgâņetâ tâņât otmu pilâņetâ yâk yengâlen bulâņe âlepņe ki tetemap. Yâhâmâ orotmemeyene âlepņe ya pilâm orotmeme bâleņe otmâ manmai. Yawu otņetâ An-itâņe nâņgâmu bâlemu hâhiwin kakņan mannomai sâm hemgât pat kuyiņgimu manmai.

⁹⁻¹⁰ Bukulipne, yuwu sâmune nâņgâņet. Yene ki otmâ tâpikgum hiliwahonomai. Yawu gârâmâ Kiristohâlen biwiyenane kepeim manņet sâm biwinane hikum mansan. Yenâmâ Anitâhât tem lâum buku konok oraņgim manmâ gai. Yawu oai yamâ Anitâņe yekmu ârândâņ oap. Yakât otmâmâ yengât nâņgâm biwiņe pâlâmņe ki otmâ pilâyekbuap. Biwiyene Kiristohâlen katbi yakât otmâ biwiyene orotok sâmapgât Anitâņe mâmâņe otyiņgiwuap. ¹¹ Yawu gârâmâ yene biwiyene Yesuhâlen ikņiâk ikņiâk katmâ denņe lâum orotmeme âlepņe otmâ manmâ gai. Yakât otmâ yawuâk torokatmâ manmâ yâhâņetgât naņgan. Yâkâlen biwiyenane kepeim manmâ yâhânomai yanâmâ Anitâņe manman kârikņahât pat kuyiņgimu tap yakât bulâņe yingimu menomai. ¹² Yawu gârâmâ manman kârikņahât pat yakât bulâņe menom sâm biwiyene ki orotok sâmu mannomaihât naņgan.

Yesuņe kulet sâm mâtâp tiripnongop ya tâņ tâņâk

watnom.

¹³ Biwiyenje orotok sâmapgât yuwu sâmune nângânet. Awoŋnenne Anitâ yâhâmâ topne âlâ. Lok me wuân me wuânne Anitâhât kunne manbuapgât dop bia. Yawuhât emelâk embânân Anitâne tâmbânenne, kutne Awaraham, yâkât nângâwanjim pat kuwanjiop sâp yan Anitâne ikne kutne ahonakmâ den ya sâm kârikne tuhumm yuwu ekuop.

¹⁴ “Gâhât biwihambâ kâu pato kândâkdâne hurunduŋ sânomai.” Yawu sâop.

¹⁵ Awarahamne den ya nângâm biwi yâhâp ki otmâ manop yakât bulâne miop. Otmu den sâop yakât bulâne yamâ nen yiwerene tetem mansain yu. ¹⁶ Anitâne ikne kutne ahonahop yakât topne nângânetâ keterahâkgât yuwu sâmune nângânet. Nenne “Wuân me wuân otnom” sâmain yan bukulipnennane nengât “lok paha” sâmai-hât yuwu sâmain. “Anitâhât senŋan wuân me wuân otnom, yawu sâmunneâmâ kârikne otnom.” Yawu sâmain. Yawu sâmain yamâ yakât bulâne ki otmâin yanâmâ Anitâne yakât matne umatne ningiwuap nângâmain.

¹⁷ Yawu gârâmâ Anitâhât komolân gâtne âlâ me âlâne den sâm kalop ya nângânetâ bonne olâkgât nângâm ikne kutne ahonakmâ den ya sâm kârikne tuhuop. ¹⁸ Otmu Anitâne den perâkne sâm kâitnongowuapgât dop âlâ ki tap. Me biwi yâhâp otbuapgât dop gurâ ki tap. Yawuhât yâkâlen biwinennane kepeim manmunne tihitnenne otmâ himbimgât pat kuningiop yakât bulâne ya bulânanâk ningimu menom yakât ki gorâningimap.

19-20 Yesu Âwânjañe tihitnenñe otmâ manman kârikñan katnenekmu mannomgât yâkâlen arimu orowâk tatmawot. Orowâk tatmutâ emelâk Melekierekñe Anitâñe lohimbi yengât tosayeñe pilâyinjiâkgât sâm ulitguop dop yawuâk Yesuñe nengât sâm Âwânje ulitgumap. Yakât nânngâm yan engat yâhâp ki otmâin. Bulânjanâk himbingât pat kuningiop yakât bulânje menom sâm biwinenñane hikuakmâ manmâ yâhânôm.

7

Melekierek yâkât topñe

¹ Lok âlâ, kutñe Melekierek sâm, yâkât topñe sâm tetemune nânngâñet. Melekierek yâhâmâ kapi âlâ, kutñe Salem, yapâ gâtñe. Yâhâ lohimbiñe yu ya Anitâhât pat kuwanjiwi ya mem Melekierek wanji. Kândikum emelâk kapam tetemu Awarahamñe ikñe kapam loklipñe dâiyekmu ari kapi nombotñe hawamgum tatbi yakât ambolipñe yongom itit kiom bâleñe tuhuyekmâ yâk yengât noniñ bulimakao, lama, senñe âlâlâ topñe topñe ya meyiñgiwi. Meyiñgim purik sâm âwuremu Melekierek orop mâtâwân enakmâ parahuakmâ Melekierekñe heronje otbangim yuwu sâm ekuop. “Anitâ kunneneñe tatmapñe mâmânje otgihimu lohimbi yengât kunyeñe manbuat.” Yawu sâm ekuop. ² Yawu sâm ekumu Awarahamñe senñe âlâlâ meyiñgiwi ya nombotñe mem hionmâ yakât sâsânjambâ konok mem Anitâhât pat kuwanjim Melekierek wanjop.

Otmu kut Melekierek yakât topñe yuwu tap, “Manman âilonjo lonjo ambonje,” yawu. Otmu

kapi kutņe, yamâ Salem, yakât topņe yuwu tap, “Biwi sânduk amboņe,” yawu. ³ Yâhâ Melekiserek ikņe hep torehenlipņe yengât kutyeņe ki tap. Otmu sâp girawuyaen teteop me muop yakât topņe gurâ yawuâk ki nangain. Yakât dopņeâk Anitâhât nanņe Yesu embâņâmbâek tatmâ gaop. Otmu yawuâk tatmâ yâhâwuap. Yakât otmâ dopyetņe konohâk oap. Nâņgâmune yawu oap.

⁴ Melekiserek yamâ lok tâņgât bia. Awaraham yamâ Isirae nengât tâmbâhât lok kutdâ manop. Yâhâ kasalipņe yongom senņe âlâlâyeņe meyiņgimâmâ nombotņe mem hioņmâ yakât sâsâņambâ konok mem Melekiserek waņop. Yawu gârâmâ yuwu sânom. Bulâņanâk Melekiserekņe Awarahamgât kunņe manop. ⁵ Yawu gârâmâ yakât kakņan Awarahamgât hâkuņe lok âlâ manop, kutņe Lewi sâm, yâkât komolân gâtņe Anitâhât hotom um manbi. Yâk yengât sâm Moseņe girem den yuwu kulemguop.

“Lewi senņe hotom um manmâ yâhânomai. Otmu Isirae lohimbi nombotņe yu me ya yeņe sâsâņambâ konok mem Lewi sen yiņginomai.” Yawu sâm kulemguop.

⁶ Yâhâ Melekiserek yamâ Awarahamgât komolân gâtņe bia. Yakât otmâmâ Awarahamņe senņe âlâlâ mem Melekiserek waņmu yâkņe yuwu sâm ekuop. “Anitâņe mâmâņe otgihimu kunyeņe manbuat.” Yawu sâm ekuop. ⁷ Yakât otmâ topyetņe girawu nâņgânom? Âlâņe kunņe manop? Melekiserek yâkņe me, me Awaraham yâkņe? Yakât yuwu sâwe. Awarahamņe Anitâhât pat kuwaņgiop ya mem Melekiserek

wanjop. Yakât otmâmâ Melekierekne Awarahamgât kunje manop. Nângâmune yawu oap.

⁸ Otmu torokatmâ yuwu sâwe. Senje âlâlâ yu me ya yeje sâsânjambâ kâsikum konok mem Lewi sen yingiminiwi. Otmu Lewi sen mum gawi ya yengât topyeje yamâ kulemgawi. Yâhâ Melekierek yâkât topneâmâ ki kulemgawi. Topne yakât otmâ Melekierekne hotom uminiwi ya yengât kunyeje manop. Nângâmune yawu oap. ⁹⁻¹⁰ Otmu Lewi sen manbi ya gurâ ki tetenetâek Awaraham Lewihât hâkne yâkne Melekierek senje âlâlâ ya wanjop. Yawu gârâmâ Lewi sen yâkne Awaraham yâkâlebâ tetem torokatmâ gawi yâkneâmâ yawuâk wanji.

Bulâne ki teteop yakât otmâmâ Anitâne Lewi sen yamâ mem ge katyehop.

¹¹ Lewi sen yengâlebâ lok kunje âlâ, kutne Aron, Mose imiye. Otmuâmâ Anitâne âiyenahât topne ya sâm tetem Mose ekumu kulemgup den ya lâum hotom um manmâ gawi. Hotom um manmâ gawi yapâ manman kârikjahât bulâne ki teteop. Ki tetemu Anitâne Lewi sen yengât nângâmu kakne olop. Nângâmu kakne otmu lok topne âlâ, ikne nanne Yesu hângângumu ge manman kârikjahât mâtâp mem teteningiop. ¹² Otmu Lewi senje hotom u uhâk mâtâp watminiwi ya pesuk sâek sâm yâkneâmâ emelâk angoân Anitâne Melekierek âi sâm wanjop ya torokatmâ tuhuop. Tuhum pesuk pilâm manman kârikjahât pat yakât bulâne mem teteningiop. ¹³⁻¹⁴ Yawu gârâmâ kutdânenne Yesu yâhâmâ Yura sen yapâ

gâtŋe. Yawu gârâmâ Moseŋe Yura sen yengât hotom um mannomai sâm ki ekyongop. Yakât otmâ Yura amboŋe âlâŋe hotom ki uop, bia kârikŋe.

15-16 Yâhâ, Yesuŋeâmâ gem Melekiŋereŋe yâkât âi ya torokatmâ mem manop yakât nâŋe yuwu nanŋan. Anitâŋe Lewi sen yâk yengât orotmemeyeŋe yakât nâŋgâmu tâŋât otmu yanŋak benŋe nanŋe hâŋgângumu ge nengât sâm muop. Mumunŋambâ yahatmâ Âwâŋe Anitâhâlen yâhâmu tawot. Tatmâ nengât sâm ulitgumap. ¹⁷ Yakât Anitâŋe nanŋe ekumu lok yanŋe den kulemgup ya yuwu tap.

“Anŋoân lok âlâ, kutŋe Melekiŋereŋe sâm, yâkŋe lohimbi yengât tosayanŋahât sâm hotom unihiwuapgât âi sâm wanŋmune mem gaop. Yawu gârâmâ âi ya sâm gihimune gâŋe torokatmâ tuhum yâhâwuat.” Yawu sâop.

18-19 Otmu yuwuhât sâop. Emelâhâmâ Lewi senŋe topŋe katmâ Moseŋe den kulemgup ya lâum hotom um orotmeme topŋe topŋe otmâ manmâ gawi. Yamâ benŋe yâk yengâlen bulâŋe âlâ ki teteop. Otmu yanŋe tânnongowuapgât dop âlâ ki teteop. Yakât otmâ Anitâŋe nâŋgâmu ki ârândân otmu nanŋe Yesuŋe mâtâp âiŋe meningiâkgât hâŋgângumu giop. Gem âi sâm wanŋop ya tuhum pesuk pilâm âwâŋahâlen âwurem yâhâmu orowâk tawot. Yakât otmâ nenŋe biwinenŋe hewewen otmu Anitâ orop den alahunomgât mâtâp teteningiop. Yakât nâŋgâm yâkâlen biwinenŋe kepeim manmâ yâhânom. Yâhâ Yesuŋe mâtâp âiŋe mem teteningiop yakât topŋe ikŋiâk tap yakât torokatmâ âlâ sâwe.

20-21 Angoân Lewi senne topne katmâ hotom une sâm âi ya mewi sâp yan Anitâne yâk yengât den âlâ ki hikuop. Âi ya in topne katmâ mewi. Yâhâ Anitâne ikñahâk den hikum nanne âi sâm wanop. Anitâne den hikum nanne ekuop ya lok yan yuwu.

“Anitâne den yuwu sâm hikumu ya kârikne olop.

Âi ya sâm gihimune gâne torokatmâ tuhumm yâhâwuwat.” Yawu kulemguop.

22 Otmu kândikum Mosenne Lewi sen âi sâm yingimu mem gawi ya pesuk sâop. Yâhâ Yesunne Anitâhât senñan âi ya memap yamâ ki pesuk sâwuap. Yakât bulâne tetewuapgât nânngâm engat yâhâp ki otmain.

23 Otmu âlâ sâwe. Lewi senâmbâ gâtne lok dondâne âi ya mem mum gawi. Mum ganetâ yâk yengât tepyene kâlehengâtne nep ya torokatmâ mem gawi. Otmu ya yawuâk âi mem yanak mum gawi. 24 Yâhâ Yesuneâmâ mumu ki pesuk sâop. Yesu yamâ mum yahalop. Yahalop gârâmâ yâhâpne ki mumbuap. Otmu âi miop ya yawuâk mem yâhâmbisâp. Yakât otmâ yâkne Lewi sen kerek yengât kunyene tatmap. 25 Yakât otmâ Anitâne umam sâningiâkgât nenne biwinenne yâkâlen kepeim manmâ yâhâmunneâmâ Yesunne tihitnenne otmâ âwâne ulitgum yâhâwuap. Yanâmâ âwânane nen den âiân katnenekbuapgât dop ki otbuap.

26 Yesunne konok sârerenenekbuapgât dop. Yâkât topne ikñiâk tap. Yâhâmâ uwawapne bia manmâ tosa âlâ ki olop. Yawuhât âwâne Anitâne mumunambâ mem yahalop. Mumunambâ yahatmâ himbimân yâhâmu orowâk tawot.

27 Otmu torokatmâ sâwe. Lewi senje, angoânâmâ yeje tosayeje Anitâje pilâyingiâkgât hotom uminiwi. Otmu yakât kakjanâmâ Anitâje lohimbi yengât tosa pilâyingiâkgât nângâm hotom uminiwi. Yâhâ Yesuje dop yawuya ki olop. Yâhâmâ tosa bia manmâ gam muop. Otmu yamâ ikjahât otmâ ya ki olop. Yakât bulâjeâmâ yuwu teteop. Nengât tosa ya âwâneje pilâningiâk sâm ikjak nengât sâm mumu ârândân olop. Yawu gârâmâ nengât sâm yâhâpne mumbuapgât mâtâp âlâ ki tetewuap. 28 Otmu yakât den pânje tâlâwâk âlâ sâmune nângânet. Angoânâmâ Mosenje âi yakât topne kulemgum kalop ya watmâ Lewi sen âi ya sâm yingimu mewi. Yâhâ lok biwi nângân nângânnenje yamâ bâleje, nen hârokne otmâ tâpikgum tosa mem gamain. Yâhâ Mosenje âi sâm yingimu mem manmâ gawi yakât kakjanâmâ Anitâje ikne nanje âi sâm wanmu miop. Yâhâ Anitâ nanjahât topneâmâ ikjiâk tap. Yâkne âi ya mem târârâhâk manmâ gam muop. Otmu mumuambâ yahatmâ himbimân yâhâmu âwâne orop tawot. Yakât otmâ âi miop yakât bulâje tetewuapgât nângâm engat yâhâp ki otmain.

8

Anitâje den hângiye pilâm yan âiye ya mem kârikne tuhuop.

1 Otmu den kulemguan yukât topne yamâ yuwu tap. Nengât Kutdânenje yamâ Yesu. Nenje yâkât topne nângâm henjenjuain. Yâhâmâ âwâne himbimân tatmap yâk orop dopyetne konohâk. 2 Emelâk angoân tâmbâlipnennejeâmâ

hotom u uhât selep tuhuwi yan Anitâñe tosayeñe pilâyinñiâkgât hotom um gawi. Yâhâ sâp yiwereneñe yuâmâ Anitâ nanñane âwâñe orop tatmâ âwâñane tosanenneñe pilâningiâk sâm ulitgumap.

³ Yâhâ Moseñe den topñe kulemgum kalop ya Lewi senñe lâum Anitâñe tosa pilâyinñiâkgât lama me nâi me âlâlâ ya gâim katmâ hotom um gawi. Yâhâ Yesuñeâmâ lama me âlâlâ ya ekmu tâñat otmu ikñe manmanñe ki alitmâ kawenennan kinmu kuñetâ muop. ⁴ Mum yahatmâ himbimân yâhâmu âwâñe orop tatmâ âi ya mem tatmap. Yâhâ hânân yuân Lewi senñe Yura ambolipñe yengât girem den watmâ Anitâñe Yura lohimbî yengât tosa pilâyinñiâkgât âi mem mansai. Yakât otmâ Anitâ nanñane torokatmâ nep membâpgât gewâk ki teteop.

⁵ Lewi senâmbâ gâtñane hotom u u emetñan yâhâm âi topñe topñe yan memai. Yâhâ yakât bulâñeâmâ himbimân Anitâ tatmawân tap. Otmu angoân emelâhâmâ Moseñe hotom um yâhâminiwi yakât selep kuñet sâm topñe kalop yanâmâ Anitâñe yakât topñeâmâ yuwu sâm tetem ekuop.

“Gâ emelâk Sinai pumñan yâhâ sâp kâlep manon yan himbimân nâhât kawine tap ya tiripgo-homune ehon. Yakât otmâ ekyongorâ ya dop kum kuñet.” Yawu sâm ekuop.

⁶ Yawu gârâmâ Kutdânenñe Yesu ikñak himbimân yâhâm nenñe lohotñe otmaingât âwâñe Anitâ ulitgum tatmap. Yakât otmâ yâkñe Lewi sen kerek yengât kunñe tap. Otmu âlâ sâwe. Moseñe den sâm teteop yakât bulâñe ki teteop. Yâhâ Anitâñe ikñe nanñe hânñgângumu ge den eknongop

yamá bulâñe teteop.

⁷ Yâhâ Mosehât girem den yakât bulâñe âlepñeâk tetem gaop mâneâmâ Anitâ nanñahâlen kulem bulâñe teteop yu ki tetembâp. ⁸⁻⁹ Yawu gârâmâ Anitâñe Mose ekumu den kulemguop yamá kerehâk ki lâuwi. Ki lâuñetâ Anitâñe nâñgâmu bâlemu yakât den âlâ yuwu sâh hikuop yakât topñe sâh tetemu poropete âlâñe kulemguop ya yuwu tap.

“Anjoânâk nâñe Isirae lohimbi Aihita hânâmbâ dâiyekmâ taka girem den ya yingim yâk orop den hikuwan. Yawu gârâmâ yâkñe den ya hâkâñ otmâ kuwi. Yakât otmâ nâku yawuâk yengât hâkâñ otmâ betyongoan. Yakât otmâmâ hâmbâi sâp âlâenâmâ Awarahamgât sen, komot yâhâp, Isirae yet Yura, yâk orop den hikumune yañe kârikñe tatmâ yâhâwuap.

¹⁰ Otmu den topñe yamá yuwu. Sâp âlâenâmâ den mâtâpñe anjo hikuwom yakât bulâñe yamá nâñe biwiyeñan kâmetbom. Otmu nâñgân nâñgânyeñan kulemgumune tatmâ yâhâwuap. Yawu otmâ nâñe yâk orop tatmâ tihityeñe otmâ yâhâmbisân.

¹¹ Sâp yanâmâ lok yahat yahatñe me lok geheñe, kutyeñe orop me kutyeñe bia, ya kerehâkñe nâhât topñe topñambâek nâñgânomai. Yakât otmâ nâhât topne ki pâpgum âi pâi tuhuanjinomai.

¹² Otmu sâp yanâmâ nâñe yengât tosa me orotmeme bâleñe yakât matñe ki yingiwom. Nâñe umam sâyingim otñetâ bâlem gaop yakât yâhâpñe ki nâñgâwom.” Anitâñe yawu sâop.

¹³ Otmu yakât yuwu sâwe. Den yakât bulâñe

yawu tetewuap. Otmu angoân Anitâne den hikuop yakât Mosenje kulemguop ya bulâne ki teteop. Yakât otmâ dop kum yuwu sâmunen nânğanet. Nak âlâ esenņane gimbangum mum beretek sâmgemap yakât dopņeâk den yaņeâmâ bialop. Yawu gârâmâ Anitâne den âine hikuop yakât bulâne tetem henņenņuwuap.

9

Emelâhâmâ orotmeme yuwu otmâ Anitâ mepaeminiwi.

¹ Otmu emelâk Anitâne girem den ya tâmbâlipnenne yinġim yâk orop den hikuop sâp yanâmâ orotmemeyene topņe topņe otmâ manņetâ ârândân olâkgât Anitâne yakât topņe Mose ekumu kulemguop. Otmu âlâmâ hotom ya girawu unomai yakât topņe ya gurâ yawuâk sâmgem tetem ekuop. ² Yâhâ hotom uminiwi selep yakât topņeâmâ yuwu. Anġoânâhâmâ hotom uminiwi yaņe âiyeņe tuhunetâ kâtâpyongoâkgât sângum kâlep ya hikuņetâ ge sârârârâk kinop. Otmu kawe yakât kutņeâmâ “Anitâ sâmgem mepaenom,” yawu kunbi. Yawu gârâmâ lohimbi nombotņe in manmaiņe ya kâlehen yâhâmai sâmgem samut katbi. Otmu kâlehen yamâ lambe saum katminiwi yakât kawe. Otmu banġa um yan Anitâhât pat kuwanġim mem yâhâ katminiwi yakât kawe. ³ Yâhâ yakât kâlehenâmâ sângum âlâ kâlep pato ya yawuâk hawamġum katmâ hikuņetâ ge hârândânâk kinop. Otmu kawe yakât kutņeâmâ “Anitâhât welâmņe,” yawu sâmgem kunbi. Yawu otmâ Anitâne yan ge tatmap nânġâm Lewihât komot kunyeņe

yâkņak yan yâhâminiop. ⁴ Otmu alata âlâenâmâ sot hotomņe topņe topņe uminiwi yakât kawe. Alata yamâ goliņak tuhuwi. Otmu Moseņe emelâk girem den tapeân kulemguop ya mem yakât emetņe goliņak tuhum katņetâ talop. Otmu âlâmâ angoân Aihita hân pilâm lok ki manmaiângen taka manņetâ yan Anitâņe sot âlâ, kutņe mana sâm, ya yingiminiop yakât nombotņe yamâ belo âlâ goliņak tuhum katbi yan mânunmâ katņetâ tatminiop. Otmu âlâmâ Arongât howan ya emelâk elelek sâm kulem olop ya. Ya yâhâp yâhâp mem hâwurum tapeân Moseņe kulemguop ya orop konohân katņetâ tap. ⁵ Otmu yakât kakņanâmâ anjelo yâhâp yetgât umutyetņe yamâ goliņak tuhum yan kânângâyelekņetâ kinminiowot yamâ yuwu nângâwi. “Anitâņe yâk yetgât hohetyetņan ge tatmâ tihitnenņe otmap. Yakât ikņe lanņinņe pato yaņe yâk yetgât hohetyetņan tetemu ekmain.” Yawu nângâwi. Yawu nângâm yan hotom uminiwi yâk yeņgât kunyeņaņe noniņ bulimakao hepņe tuangumu geminiop. Otmu den yu ekyongomune kâlep kâlep olâkgât ki nanņan. Yawuhât tâlâwâk sâwoman.

⁶ Otmu tâmbâlipnenņaņe yu me ya otnehât nângâwi. Yamâ Lewihât komolân gâtņe yaņe kawe âlâ, kutņe “Anitâ sâm mepaenom,” yan hilâm ârândânĳak yâhâm lohimbi kerek belângen manbi yeņgât sâm Anitâ ulitgum mepaewi. Otmu lohimbiņe yu me ya Anitâ waņnehât nângâwi yamâ mem kawe yan katmâ gawi. ⁷ Otmu hotom u u yakât kawe, kutņe “Anitâhât welâmņe” yan hotom um gawi ya yeņgât kunņe, lok konohâkņe, yâhâmâmâ ikņe, otmu bukuliņe nombotņe, otmu

Isirae lohimbi kerek yâkņe otmâ tâpikgum manbi ya kerek yengât tosa ya Anitâņe pilâyinģiâkgât yan yâhâop. Otmu yambu konok yakât biwiņan hilâm konohâk Anitâhât kawenjan yâhâm noniņ bulimakao lokņe kum ya hepņe tuanguminiop. ⁸⁻⁹ Otmu Anitâhât Wâtgât mâmâņahât Heakņe biwi nâņgân nâņgânnenņe mem hewewenņe tuhumu yakât topņe yuwu nâņgâwin. Hotom uminiwi yakât kawean lohimbi kerehâkņe ki yâhâminiwi. Yawu nanģain. Otmu Lewihât komolân gâtņeņe âiyeņe tuhumi yan Anitâņe ya ekmâ tep âlep nâņgâyinģiâkgât ya otminiwi. Yamâ ya ekmâmâ yuwu nanģain. ¹⁰ Orotmemenenņe âlâlâ yu me ya ki orotņe sâm kuanģiwin, me ki neņet sâm, me ki meņet sâm undip karanģiwin ya ihilâk lonģemâmâ otmâ tâpikguminiwin. Otmunņe bâleminiop yakât tosa Anitâņe pilâningiâkgât hep tuanguminiwi. Hep tuanguminiwi yaņe tânnongom manman mem teteningimbâņgât dop ki talop. Yaņeâmâ orotmemenenņe bâleņe ya ekmunņe teteâkgât yawu otminiwin. Yawuâk torokatmâ otmâ ganetâ Anitâņe nâņgâmu ki ârândâņ olop. Yawu gârâmâ yâkņe biwinenņe ekmâ nâņgâm ikņe nanņe tâņ tâņâkņe mâtâp âiņe meningiâkgât hânģangumu giop. Gem yan hotom uminiwi yakât bonņe yamâ yâkņe mem teteop.

Yesuņeâmâ mâtâp âiņe mem teteningiop.

¹¹ Otmu yakât topņe nâņgâm hengenģuņetgât torokatmâ yuwu sâmune nâņgâņet. Hânân yuân hotom u uhât selepņe tuhuwi yan Yesuņe ki yâhâm hotom ya uop. Bia kârikņe. Yâkņeâmâ himbimân yâhâm âwâņe Anitâ orowâk tatmâ manman

kârikņe yakât pat kuningim yakât bulâņe nenņe menehât alahum tatmawot. ¹² Otmu âlâ yuwu sâwe. Hotom um gawi ya yengât kunņaņeâmâ noniņ bulimakao gâim hep ya mem sâņgum kâlep mem yahatmâ kâlehen baminiop. Bam yan An-itâhât welâmņan hep tuangumu kakņan geminiop. Yesu Kiristonje yawu ki olop. Yâkņeâmâ kawenņan kinmu kuņetâ muop yan ikņe hepņe tosanenņe piringiop. Yâkņe yawu otmâ An-itâhâlen yâhâm sârerenenehop. Yawu olop yakât otmâ nenņe yâkât manmanân torokatmâ manmâ yâhânom.

¹³ Yâhâ emelâhâmâ yuwu otminiwi. Lohimbi âlâ me âlâņe lok mumuņe wâimai sâm Lewihât komolân gâtņe samut katminiwi. Yâhâ lohimbi âlâ me âlâņe wâinomai yanâmâ Lewihât komolân gâtņe bulimakao nanņe gâim uņetâ sem kou otminiop. Kou yaņe mem lok mumuņe wâiop yakât hâkņan samut ya biatbaņgiâkgât moselemeniwi. Otmu âlâmâ hotom um yan yuwu nâņgâminiwi. “Yâkņeâmâ noniņ bulimakao gâiņetâ yakât hepņe gem yan nenņe manman âilonņo loņgo me tosa bia mannehât gem piriap,” yawu nâņgâm yan otminiwi. ¹⁴ Yuâmâ Kiristo yâkņe giop. Yamâ Anitâhât Wâtgât Mâmâņahât Heak embâņân âlâlâ ki tetemuâk tatmâ gamap yaņe mâmâņe otbaņgimu tosa bia manmâ gam kawenņan kinmu kuņetâ mum yan ikņe hepņe giop. Yawu otmâ biwi nâņgân nâņgânenņe hewewen otmu Anitâhât tem lâum hoņ bawañginehât manmunņe bâlem gaop yakât tosa yamâ konohâk piriimu biatmâ meteop. Yakât otmâ lokgât orotmeme

tâjât ya pilâm biwi nângân nângânnenjaŋe yâk konok hikum yâkât pat manmâ yâhânôm.

¹⁵ Otmu torokatmâ sâwe. Anitâŋe dâinenekmâ manman kârikŋe yakât pat kuningim den hikuop yakât bulâŋe menehât Kiristonŋe nengât sâm muop. Mum yan otmunŋe bâlem gaop yakât Anitâŋe matŋe umatŋe ningimap sâm yakât manman kârikŋe yakât mâtâp âiŋe mem teteningiop. Otmu emelâk Lewi sen yengât amutgen manmâ mâtâp ya watmâ otmunŋe bâlem gaop yakât tosa ya Yesuŋe pilâningim sârerenehop.

Moseŋe noniŋ bulimakao hepŋe mem tuanŋuop.

¹⁶⁻¹⁷ Otmu nenŋe orotmemeâmâ yuwu tap. Umatŋe âlâlâ yu me ya teteningimu munomân senŋe âlâlâ yuwu yawuya miaknomai yawu sâmâmâ nan baralipnenŋe yamâ bâtnenŋe bâiŋe yakât pat kuyiŋimain. Otmu den ya sâm pat kuyiŋimain yakât bulâŋe yamâ orowâk manmâ yâhânômân yan bonŋe ki teteyiŋiwuap. Nen mumunŋe yakât kakŋan bulâŋe yamâ âlepŋe miaknomai. ¹⁸ Yakât dowâk Anitâŋe angoânâmâ den ya sâm hikuop yakât bulâŋe teteâkgât Moseŋe den ya kulemgum inâk ki kalop. Yuwu otmâ kalop. ¹⁹ Yâkŋe pepa mem lohimbi komot pato yaŋe Anitâhât den ya topŋambâek nângâŋetâ keterahâkgât ekyongomu nângâwi. Otmu den sâop yakât bulâŋe ya tetem heŋgenŋuâkgât yâkŋe noniŋ bulimakao hepŋe ya to orop menduhum memâmâ tuanŋumu pepaen giop. Tuanŋumu gemu nak bât bâtŋe mem losohomâmâ sâŋgum âlâ mem yakât potonŋan kepeim hewân kalop. Katmu hewâk pato otmuâmâ den ya sâm teteop yakât

bulâñe teteâkgât hep tuangumu lohimbi kerek kakyeñan giop. ²⁰ Yawu ekmâ topñe nâñgâñetgât yuwu sâm ekyongop.

“Girem den Anitâñe sâm hikuop ya lâum manñetâ bulâñe teteyiñgiâkgât hep yuâmâ mem tuanguan. Yakât topñe ekmâ nâñgâm heñgeñgunomai.” Yawu sâm ekyongop.

²¹ Otmu yawuâk wahap yu me ya Anitâñe nâñgâyñgiâkgât sâm katbi ya kakñan gurâ hep mem tuangumu giop. ²² Otmu den kârikñe emelâk kulemguop yakât topñe yuwu tap. Noniñ bulimakao me âlâlâ ki gâim hepñe lâum moseleñetâ geminiop yanâmâ tosayeñe yawuâk tatminiop. Yâhâ lâum moselewi yanâmâ Anitâñe tosayeñe pilâm umam sâyñgiopgât mâtâp ya teteyiñgiop.

Yesuñe nengât toсахât otmâ mumu ârândânñ olop.

²³ Otmu Moseñe hep ya mem senñe âlâlâ ya kakñan tuangumu giop ya ârândânñ olop. Yâhâ yiwereñe yuâmâ senñe âlâlâ hep yañe tuanguop yakât bonñe himbimân tap. Yakât hep tuanguop yañe bulâñe ki olop. Yakât otmuâmâ heñgeñguâkgât Yesuñe himbimân yâhâop. ²⁴ Yawu gârâmâ Anitâhât kawê bulâñe ya himbimân tap yakât Yesuñe yuân hânân in selep kum yan yâhâ hotom uwi yan ki yâhâop. Yâkñeâmâ himbimân yan yâhâop yanâmâ yâkñe nenñe lohotñe otmaingât âwâñeñe mâmâñe otniñgiâk sâm ulitgum tatmap. ²⁵ Otmu torokatmâmâ âlâ yuwu sâmune nâñgâñet. Hotom um gawi ya yeñgât kunyeñeñe yambu ârândânñâk yâhâ noniñ bulimakao me âlâlâ hepñe lâum tuanguminiop. Yâhâ Kiristoñe yambu ârândânñ ki mum hepñe

gemap. Yâhâmâ sâp konok kuñetâ muop yan hepñe gemu ârândân olop. ²⁶ Yawu gârâmâ Kiristoneâmâ yâkñe otminiwi yawu ki olop. Yawu olop mâne emelâk embânân lohimbi kândikyotgop yapâek yambu ârândân kuñetâ mum hepñe gembâp. Yâhâ yâkñeâmâ ya ki olop. Âwânaje tosanenñe pilâm umam sâningiâkgât mâtâp âiñe mem teteningim kawenenñan kinmu sâp konok kuñetâ muop yan ikñe hepñajak nengât tosanenñe pirimu ârândân olop. ²⁷ Otmu Anitâñe sâop yakât nen munom yakât kakñan biwinenñe ikñiâk ikñiâk ekmâ nâñgâm topnenñe mem tetewuap. Mem tetemâmâ otbin mewin yakât matñe âlâku ikñe ambo ambo ningimu menom. ²⁸ Yakât otmâ lohimbi nengât tosa ya bialâkgât Anitâñe nâñgâwanjimu Yesuñe nengât toсахât otmâ muop. Mumu ârândân sâop gârâmâ Yesuñe yâhâpñe mumbuapgât dop âlâ ki tap. Emelâk mumu otmu ârândân olop. Yakât otmâmâ nenñe biwi nâñgân nâñgânnenñe yâkâlen katmâ manmunñe yanâmâ yâkñe den âiân yâhâpñe katnenekbuapgât dop ki otbuap. Yâhâ nenñe biwi nâñgân nâñgânnenñe yâk kepeim manmunñe taka menenekmu orowâk ari manmâ yâhânom nâñgâm biwinenñe yakât mem mambotbanjim mannom.

10

Emelâhâmâ hep tuan guminiwi yamâ imbiâk otminiwi.

¹ Otmu emelâk Anitâñe den âlâlâ Mose ekumu kulemgup ya lâum hotom uminiwi ya yeñgât kunñe âlânñe yambu ârândânâk hotom uminiwiân

noniŋ bulimakao me âlâlâ hepŋe mem yâhâ tuanġuminiop. Yakât otmâ lohimbiŋe tosayeŋe ya bunewâk pesuk sâyĩngimu Anitâhâlen torokatno-mai yakât mâtâp ki teteop. Yâkâlen torokatne sâm pâpġuwi. ² Yâhâ sâp yan tosayeŋe ya pesuk sâop mâne hotom uwi yakât kakŋan âi ya yâhâpŋe torokatmâ ki membâp. Otmu tosayeŋe ya emelâk bialop mâne manman sânduhân manbâi. ³⁻⁴ Yawu ġârâmâ otŋetâ bâlem gaop yakât nelâm yongomapġât yambu ârândânġâk hotom uminiwi ya yengât kunyeŋe noniŋ bulimakao yakât hepŋe mem yâhâ tuanġuminiop. Yawu otŋetâ manmâ gawi yamâ tosayeŋe yakât nânġâmâk manmâ gawi.

⁵⁻⁶ Otmu tosayeŋe yawuâk tatyĩngimu manmâ gawi yakât Kiristoŋe âwâŋe Anitâ den yuwu sâm ekuop ya poropete âlâŋe kulemġuop.

“Anitâ, Kutdâne, ġâmâ noniŋ bulimakao me âlâlâ ya ġâim hotom uŋetâ nânġârâ ya bonŋe ki otmap. Otmu hep mem tuanġum mansai yakât nânġârâ bonŋe ki otmap. Otmu sot um ġâhât pat katmai yakât ġurâ nânġârâ tâŋât otmap.

⁷ Yawu ġârâmâ nâŋeâmâ lok otmâ hoŋ bahihim ġâŋe den tâŋ tâŋâk lâum yan yakât bonŋe memune ârândânġ otbuap.” Yawu sâop.

Yawu sâm yan Yesu Kiristoŋe himbim pilâm ge den yakât bulâŋe ya mem teteop.

⁸ Yâhâ den yakât topŋeâmâ yuwu tap. Anġoân Kiristoŋe den yuwu sâop.

“ġâmâ yâkŋe noniŋ bulimakao ya ġâim hotom umai, me hepŋe mem tuanġuŋetâ ġemap, me

sot um gâhât pat sâm katmai ya kerek ekmâ nângârâ bulâne ki otmap.” Yawu sâop.

Yawu otmâ Isirae lohimbiŋe Anitâhât den bi-wiyenaje ki kepeim lâum gawi, imbiâk lâum gawi yakât Anitâne nângâmu bâleop. ⁹ Kiristone den sâm teteop yan torokatmâmâ den âlâ yuwu sâop.

“Nâneâmâ hoŋ bahihim gâhât den tâŋ tâŋâk lâum yan yakât bonne memune ârândâŋ otbuap.”
Yawu sâop.

Yawu otmâ Anitâne den âlâlâ Mose ekumu kulenguop ya lâum hotom uminiwiŋe yakât bulâne ki mewi. Yakât otmâ Anitâne bonne teteâkgât sâm nanŋe Yesu Kiristo hângângumu ge muop. ¹⁰ Yesu Kiristone ikne manmanne ki alilop. Yawu otmâ Anitâne âi sâm waŋop ya lâum manmâ gam muop. Yakât otmâ tosanenne kerehâk pilâningimu nenŋe Anitâhât senŋan aŋun bia manmâ yâhânomgât mâtâp ya sâm ningiop.

Yesu kuŋetâ hepne gemu ârândâŋ olop.

¹¹ Bukulipne, den yu yâhâpne torokatmâ sâwe. Anitâne nenekmu ârândâŋ olâk sâm Lewi senŋe noniŋ bulimakao gâim hep tuangum âlâlâ tâtâemâk otmâ gawi yakât bulâne ki teteop. ¹² Yawu otmâ gaŋetâ Anitâne tosanenne pilâningiâkgât Yesuŋe nengât kawenenŋan kinmu kuŋetâ muop. Yawu otmâ yanâmâ manman kârikŋahât bulâne ya teteop. Yawu otmâ muop gârâmâ yâhâpne mumbuapgât mâtâp ya ki tap. Emelâk ya otmu ârândâŋ olop. Otmu mum yahatmâ Anitâhâlen yâhâ tat tat kârikne tatmâ yâhâmbisâp. ¹³ Anitâne Satan bâleŋe otmu kasa nombotne mansai ya kerek hilipyongom mem ge katyekbuap

yakât Yesuŋe mambotmap. ¹⁴ Otmu sâmunenânġâŋet. Yesuŋeâmâ mum yahalop yâkâlen nenŋe biwinenŋaŋe kepeim manmain. Yawu otmunŋe Anitâŋe tosanenŋe kerehâk pilâningimu ikŋe senŋan salehâk manmâ yâhânom.

¹⁵ Otmu yukât topŋe teteâkgât Anitâhât Wâtġât mâmâŋahât Heakŋe topŋe ya sâm tetemu poropete âlâŋe kulemguop ya yuwu tap.

¹⁶ “Kutdânennŋaŋe yuwu torokatmâ sâop. Sâp âlâenâmâ den mâtâpŋe aŋgo hikuwom yakât bulâŋe yamâ nâŋe biwiyenŋan kâmetbom. Otmu nânġân nânġânyenŋan kulemgumune tatbuap.”

¹⁷ Yawu sâmâmâ yuwu torokatmâ sâop.

“Nâŋe yeŋġât tosa me orotmeme bâleŋe yakât matŋe ki yinġiwom. Umam sâyinġiwom. Yawu otmâ yakât yâhâpŋe ki nânġâwom.”

Kutdânennŋaŋe yawu sâop. ¹⁸ Otmu “Umam sâyinġiwom yakât kakŋan otġetâ bâlem gaop yakât yâhâpŋe ki nânġâwom,” yawu sâop. Yawu ġârâmâ Lewihât senŋe hotom uminiwi ya yanâk pesuk sâop.

Anitâŋe pat kuningiop yakât bulâŋe menehât nânġâm manmâ yâhânom.

¹⁹ Bukulipne, den sâm tetean yu nânġâm heŋenġumâmâ topne yuwu nânġânomai. Emelâhâmâ Anitâhât kawe ya sâŋumŋe hikum maŋguminiwi. Yamâ himbimân manman tap yakât umutŋe. ²⁰⁻²¹ Yâhâ yakât bulâŋeâmâ nengât sâm Yesu howanân kuŋetâ mumu hepŋe ġiop. Otmu mum yahalop. Yâkŋe kunnenŋe otmâ kulet sâningim Anitâ âwâŋahâlen yâhâop. Yawu otmâ yâkŋe sâŋum ya gahaem pilâm Anitâhâlen

yâhânongât mâtâp âiŋe mem kusâningiop.
²² Yawu gârâmâ yakât kakŋan nen yuwu sâwin.
 “Emelâk tosanenŋe ya bialop.” Yawu sâmunŋe
 toen mem katnenehop yakât nâŋgâm biwi
 yâhâp ki otnom. Yawu otmâ Anitâhâlen haonmâ
 ârândânŋ biwi nâŋgân nâŋgânnenŋaŋe kepeim yâk
 mepaem manmâ yâhânôm. ²³ Otmu Anitâŋe den
 perâk ki sâmapŋe emelâhâk manman kârikŋe
 yakât pat kuningiop yakât bulâŋe mene sâm
 yâkâlen biwi nâŋgân nâŋgânnenŋaŋe kepeim
 mannom. Yawu otmâ enŋat yâhâp ki otnom.
²⁴ Yawu otmâ bukulipnenŋe orop biwi nâŋgân
 nâŋgânnenŋaŋe kepeiakmâ konohâk otmu mem
 hewewenŋ tuhuakmâ buku konok oranŋim
 manmâ yâhânôm. ²⁵ Lohimbi nombotŋaŋe
 lohotŋe otmâ ki menduhuakmâ Anitâ mepaem
 mansai. Nenneâmâ yâkŋe otmai yawu ki
 otnom. Kutdânenŋe Kiristoŋe sâp girawuân
 taka menenekbuap yakât nâŋgâm nenŋe
 menduhuakmâ Anitâ mepaem yâkâlâk nâŋgâm
 mannom.

²⁶ Yakât torokatmâ sâwe. Den pat âlepŋe ya
 nâŋgâm heŋenŋum Yesuhâlen biwinenŋaŋe
 kepeim manmâ gain. Yawu gârâmâ nenŋe
 lohotŋe otmâ orotmemenenŋe bâleŋe ya
 mem miwirikum torokatmâ otmâ yâhânôm.
 Yawu otnom. Otmuâmâ Anitâŋe tosanenŋe
 pilâningiâkgât yâhâpŋe kuŋetâ mumbuapgât
 dop âlâ ki tetewuap. Bia kârikŋe. ²⁷ Yâhâ
 nenŋe orotmemenenŋe bâleŋe ya miwirikum
 yâhâpŋe torokatmâ otmâ mannom otmuâmâ
 Anitâŋe matŋe umatŋe ningiwuap. Yawu otmâ
 hemân pilânenekmu gemunŋe kâlâpŋe senenekmu

hâhiwin kakņan manmâ yâhâmbisâingât mâtâp tap. ²⁸ Yakât yuwu torokatmâ sâwe. Emelâhâmâ orotmeme yuwu otmâ manbi. Lok âlâ me âlâņe Mosehât girem den ya loņgâenomai otmuâmâ lohimbi yâhâp me kalimbu yaņe yakât topņe ekmâ nâņgâm ya sâm tetenjetâmâ papatolipyenāņe yuwu sâminiwi. “Ya bulâņanâk orotmeme kiņgoņ ya otmâ mansap.” Yawu sâm yakât matņe in yawu yongoņetâ muminwi. Orotmeme yawu otmâ manbi. ²⁹ Yakât otmâmâ yuwu torokatmâ sâwe. Anitâ nanņe nengât tosanenņahât otmâ kawenenņan kinmu kuņetâ mumu hepņe giop. Yakât nâņgâņetâ bulâņe otmu lohimbi âlâ me âlâņe yâkâlen biwiyenē katmâ mannomai. Yawu gârâmâ yakât kakņan nâņgâņetâ tâņât otmu betgunomai. Yawu otmâ Anitâhât Wâtgât Mâmâņahât Heak ikņahâk mâmâņe otyiņgim tihityenē otmap ya gurâ yawuâhâk betgunomai. Lohimbi yawu manmâ yâhânomai yamâ Anitâ ikņak matņe umatņe yiņgimu mem yaņak hem nâpumân kioņnomai. ³⁰ Emelâhâk emet inânņan topņe tetemu eknehât Anitâņe den sâm tetemu poropete âlâņe kulemguop ya yuwu tap.

“Ninak matņe yiņgimune mem umatņe kakņan mannomai.”

Otmu âlâmâ yuwu sâm tetemu poropete âlâņe kulemguop.

“Anitâ ikņe lohimbilipņāņe denņe nâņgâņetâ gemu betbaņginomai yâk den âiân katyekmâ topyenē mem tetewuap. Topyenē mem tetem matņe mem purik pilâyiņgiwuap.”

Yâkņe yawu otyiņgimu hâhiwin nâņgâm manmâ yâhânomai. ³¹ Yen yawu otmaiĥât yuwu sâmune

nângânet. Anitâ manman ambonaje sâmu hâhiwin kaknan manmaihât kinjityenahât ki oai, hâ? Yawuhât nângâm denje lâum manjet.

³² Yakât topne yuwu sâmune nângânet. Yene topne katmâ biwiyene Yesuhâlen katbi. Yawu otmâ topne ya nângâm henjengui. Yawu otmâ biwiyene yâkâlen hikum lâum manmâ ganjetâ lohimbî belângen mansaije mem bâleyekbi. Mem bâleyekjetâ hâhiwin kaknan manmâ gawi.

³³ Otmu lohimbî belângen mansai nombotjane yengâlen takam lok sensenân kinmâ senyenjan gem yongom mem ge katyekmâ girinjingwi. Yawu gârâmâ yeneâmâ yakât sâmu yâk yengât senyenjan lohotje ki otbi. Otmu kasalipyenane bukulipyenane yawuâk otyinginetâmâ yanâmâ yâk yengâlen torokatmâ tânyongowi.

³⁴ Yâhâ bukulipyenane nombotje yamâ mem pâi emetje kâlehen katyekjetâ manbi yâk yengâlen ari sot um yingim tânyongowi. Yâhâ lohimbî belângen mansaijenâmâ senje âlâlâ wuân me wuân tatyngiop yamâ kombo meyingiwiân yanâmâ ki gorâyngiop. Yenâmâ manman kârikjahât pat Anitâne kuyngiop yakât bulâne yamâ kombo meyinginomaihât dop âlâ ki tap. Yakât nângâm manmâ gam biwi yâhâp ki otbi.

³⁵ Yakât otmâmâ topyene yuwu nângâm henjengunomai. Yenâmâ emelâk gihityene ya kârikje olop. Yawu gârâmâ umatje topne topne teteyngiwuap otmuâmâ kârihem manman kârikjahât pat kuyngiop yakât bulâne menehât nângâm mannomai.

³⁶ Yawu nângâm Yesuhâlenâk biwi nângân nângânyenane kepeim manmâ Anitâhât tem lâuwanjgim yakât

bulâñe ya menomai. ³⁷ Yakât yuwu torokatmâ sâwe. Anitâñe sâmu poropete âlâñe emet inânñan den kulemguoop ya yuwu tap.

“Takawuap yañe kâlep ki otmâek benñe takawuap. ³⁸ Otmu yeñe biwiyenñe nâhâlen katñetâ manman kârikñahât pat kuyiñgiwan. Yakât otmâ ki lohotñe otmâ biwiyenñe houñ sâwuap. Yenâmâ pat kuyiñgiwan yakât bulâñe menomai. Yawu gârâmâ yeñgâlen gâtñe âlâ me âlâñe mambotñetâ kâlep otmu biwiyenñe orotok sâmu betnohonomai otmuâmâ lohimbî yawuya yeñgât nâñgâmunne bâlemu umatñe kakñan katyekmunne mannomai.”

Yawu kulemguoop tap. ³⁹ Yawu gârâmâ yâkñe mansai yan ki torokatmâ mannomai. Yâhâmâ Anitâhât den ya nâñgâñetâ gemu betbangiwi yakât matñe yâkñe ikñiâk ikñiâk kâpekyiñgiwuap. Yâhâ yeñeâmâ yawu ki otmâ mansai. Yakât otmâ biwi nâñgân nâñgânyenñe Anitâhâlenâk katñetâ kinmu yâk konok mepaem manñetâ Anitâñe meyekmâ manman kârikñan katyekbuap.

11

Anitâhât den nâñgâñetâ bulâñe olop yâkñeâmâ biwi yâhâp ki otbî.

¹ Bukulipne, yuwu sâmunne nâñgâñet. Anitâhâlen biwinenñañe kepeimunñe kinmâ yâhâekgât nâñgâm mannom. Yakât topñe yuwu ekyongomune nâñgâñet. Anitâñe den sâop yakât bonñe yamâ tetewuap. Yakât otmâ nenñe Anitâhât den yakât nâñgâm engat yâhâp ki otnom. Teteningiwuap nâñgâm biwinenñañe nâñgâmunñe

bulâñe otbuap. ² Emelâk tâmbâlipnenñe nombotñane Anitâñe den ekyongop ya nâñgâñetâ bulâñe otmu yakât engat yâhâp ki otbi. Yawu otbi yakât otmâ Anitâñe nâñgâñingimu ârândâñ olop.

³ Embâñân topñe katmâ Anitâñe sâmu hân himbim âlâlâ topñe topñe biaembâ teteop ya nenâmâ bulâñanâk ki ekmâ manbin. Otmuâmâ nenñe Anitâhâlen biwinenañe kepeiwin yamâ Anitâñe yu ya olop yakât den pat sâm teteop ya nâñgâmunñe bulâñe dondâ oap. Den sâm teteop ya nâñgâm biwi yâhâp ki otmâ manmâ gain. Otmu yakât topñe nâñgâñetâ keterahâkgât emelâk manbi yâk yenğât topyene ekmâ nâñgâne.

⁴ Yawu gârâmâ tâmbânenñe âlâ, kutñe Awe sâm, yâkñe Anitâhâlen biwi nâñgân nâñgânñane kepeim manop. Yawu manmâ sâp âlâen lama nanñe gâim Anitâhât hotom uop. Yawu otmu Anitâñe yâkât nâñgâmu ârândâñ olop. Otmu atañe, kutñe Kain sâm, yâkñeâmâ Anitâhât den ya nâñgâmu bulâñe ki olop. Yakât otmâ yâkñeâmâ sot inñe hâwurum hotom ya umu Anitâñe ekmu ki ârândâñ olop. Yakât otmâmâ kâñe tepñan tâlimu imiñe kumu muop. Yâhâ imiñaneâmâ Anitâhâlen biwiñane kepeim pat kuwañgiop yakât bulâñe hâmbâi membom nâñgâm manop. Yawu gârâmâ nenñe Anitâhâlen biwi nâñgân nâñgânnenñane kepeim yâkñe olop yawuâhâk otmâ manmâ yâhânom.

⁵ Yâhâ lok âlâmâ, kutñe Enoko sâm, yâkñeâmâ Anitâhâlenâk biwi nâñgân nâñgânñane kepeim manop. Yawu manmâ gamu Anitâñe yakât nâñgâwañgimu âilongo olop. Yakât otmâ ki muop. Anitâñe golâek memmu yâkâlen yâhâop. Yawu

otmâmâ bukulipņajeâmâ “Enoko ya wosaken arap,” sâm pânņetâ bialop. ⁶ Yawu gârâmâ yuwu nanğain. “Anitâ ya bulâņanâk tap. Yakât otmâ nenņe yâkâlen biwinenņaje kepeine sâm otmunņeâmâ yâkņe âlepņe nâņgâningiwuap.” Yawu nanğain. Yawu gârâmâ nenņe yâkâlen biwinenņaje kepeim manmunņe yanâmâ yâkņe nenekmu ârândâņ otmap.

⁷ Otmu dop yawuâk lok âlâ, kutņe Noa sâm, yâkņe Anitâhâlen biwi nâņgân nâņgânņaje kepeim manop. Yakât otmâ Anitâņe tonğelâk pato takawuap sâm inânņan ekuop. Ekumu yâkâlen biwi nâņgân nâņgânņaje kepeiopgât otmâ enğat yâhâp ki olop. Yawu otmâmâ biwiņaje yuwu nâņgâop. “O yuâmâ nen kerek hiliwahom metenomosain.” Yawu nâņgâm yan waņga tuhuop. Waņga tuhum ikņe hepņe torehenlipņe ya hârehâk waņgaen yâhâwi. Waņgaen yâhâņetâmâ tonğelâk pato gem to niņ niņ sâm gam lohimbî biwi pâlâmņe manbî ya aksihâk haranyongop. Yawu gârâmâ Anitâņe den ekuop ya Noaņe nâņgâmu bulâņe otmu yâkâlen biwi nâņgân nâņgânņe kepeim denņe lâuop. Yakât otmâ Anitâņe nâņgâwaņgim manman kârikņahât pat kuwaņgiop

⁸ Yâhâ âlâmâ yuwu. Anitâņe Awaraham ekum hân âlâ yakât pat kuwaņgiop. Yakât pat kuwaņgimu Awarahamņe yâkâlen biwi nâņgân nâņgânņaje kepeim denņe lâum kapiņe pilâm kapi âlâengen ariop. ⁹ Ari mem tetem yuwu nâņgâop. “Hâmbâi nâhât senņe yuân manmâ yâhânomai yakât bonņe hân yu mian.” Yawu nâņgâm emet bulâņe ki tuhuop. Selep kandi kum yan manop.

Yawu manmu nanŋe, Isaka sâŋ, otmu sesenŋe, Yakop sâŋ yâku yawuâk selep kandi kum yan manmâ gawi. Yâhâ Awaraham, Isaka, Yakop yâkŋe yuwu nâŋgâwi. “Hâmbâi nengât sen hân yuânâk manmâ yâhânômai,” yawu nâŋgâm yan yanâk manmâ gawi. ¹⁰ Yâhâ Anitâŋe Awaraham den ekuop yakât bulâŋe hâmbâi tetewuap nâŋgâm yâkâlen biwiŋaŋe kepeim manop. Otmu Anitâŋe kapi âlepŋe nandoroŋe sâop yakât bulâŋe himbimân tetewuap yakât gurâ nâŋgâm manop.

¹¹ Otmu Awaraham imbiŋe, kutŋe Sara, yâk gurâ yawuâk biwiŋaŋe Anitâhâlenâk kepeim manmâ gaop. Saraŋe kâsiâk manmâ gam sombo olop. Yâhâ embâŋân emet inânŋan Anitâŋe yuwu sâŋ ekuop. “Hâmbâi nange tetewuap.” Yawu sâŋ den ekuop ya nâŋgâmu bulâŋe olop. Yakât otmâ sombo olowâke yamâ benŋe somboŋahât nanŋe, Isaka sâŋ, ya mem ga kalop. ¹² Yâhâ Awarahamâmâ sombo dondâ otmâ mumuhât sâp emelâk wangiop. Yawu manowâke yamâ benŋe yâkŋe Anitâhâlen biwiŋaŋe kepeim yâkât den lâum manmâ gaop. Yakât otmâmâ nen yâkât sen man-sainŋe tetem yanâk torokatmâ manmâ gain yu. Yawu gârâmâ nen Awarahamgât biwiŋan gâtŋe lok yamâ saru sâtŋan sak ekmain yakât dop mansain. Otmu pitu kiŋgitŋe orowâk ewan kinmu ekmain yakât dop yawu.

¹³ Lohimbi kutyenŋe yongonmâ aran yuŋeâmâ Anitâŋe den sâop yakât bonŋe ya hâmbâi tetewuap nâŋgâm yâkâlen biwiŋeŋe kepeim manmâ gam muwi. Otmu den sâop yakât bulâŋe yamâ manbi yan ki mem tetewi. Ki mem tetemâmâ yuwu

nângâwi. “Nen kandi mansain,” yawu nângâm biwiyenê ki giop. Otmu engat yâhâp gurâ ki otbi. ¹⁴⁻¹⁵ Lohimbi yu yan Anitâhâlen biwi nângân nângânyenê kepeim manmâ, “Nen kandi mansain,” yawu nângâm kapi âlâhât pat kuyingiop yakât bulânê tetewuap sâam manmâ gawi. Yawu gârâmâ “Nen kandi mansain,” yawu sâwi yamâ hânnyenê tâmbânê yakât nângâm ki sâwi. Yakât nângâm sâwi mâne purik sâam âwurem ari kapi pilâm takawi yan manbâi. ¹⁶ Yawu gârâmâ Anitânê himbimân kapi âlepê nandoroê yakât pat kuyingiop ya ambokunom nângâm denê lâum mem mete tuhum manbi. Anitâhât den tem lâum manmâ yan, “Anitâ Ambonenê,” yawu sâam mepaem manbi. Yakât otmâ Anitânê nângâyingimu ârândân olop.

¹⁷⁻¹⁸ Otmu Awaraham yâkâlâk âlâ torokatmâ sâwe. Emelâk embânân Anitânê Awaraham yuwu sâam ekuop. “Isakahât biwinjambâ gâhât seselipge hurunduê sânomai.” Yawu sâop. Yawu sâop yakât kakjan Awarahamgât topê tetemu ekbehât Anitânê ekumu ikê nanê kumu mumu yâkât hotom umbe sâam nanê dâim ariop. ¹⁹ Dâim arimâmâ biwinjê yuwu nângâop. “Nane ombe bisine konok yu kumune mumbuap. Kumune mumu yanâmâ Anitânê mumunambâ mem yahatmu manbuap yakât wâtê tatbangiap.” Yawu nângâm yanâmâ hotom ya umbe sâam nanê dâim ariop. Otmu hâmbâi Anitânê sâamu lok mumunambâ yahatnomai ya nângâm kinmâ nanê mem alata kakjan kalop. Katmu tatmu emelâk tewetê mem hâuwe sâam inanangumu yanâk Anitânê kuwangiop. Emelâk muowâke yamâ nanê

memu pilâm ariowot. Yawu.

20 Yâhâ Isakanjeâmâ Anitâhâlen biwi nângân nângânjaŋe kepeim manop yakât otmâmâ yâkâlembâ nanyâhâtŋe yâhâp teteowot, kutyetŋe Yakop yet Esau sâŋ, emet inânŋanâk Anitâŋe sâŋu teteyitgiwuap yakât pat kuyitgiop.

21 Otmu Yakopŋe yawuâk biwi nângân nângânjaŋe Anitâhâlen kepeim biwi yâhâp ki otmâ manop. Yakât otmuâmâ emelâk sombo otmâ kâmgum talop yan Anitâ mepaem nanŋe Yosepgât nanyâhâtŋe ya pat kuyitgiop.

22 Otmu Yosepŋe mumbe sâŋ otmâmâ Anitâŋe Isirae lohimbi Aihita hânâmbâ mem dâiyekbuap yakât emet inânŋan seselipŋe yuwu sâŋ ekyon-gop. “Hâmbâi mâne yengât sen tetem sambe otmâ manomai. Yawu otŋetâ Anitâŋe yupâ mem dâiyekmu ari yengât hân sâŋ pat kuyiŋgiop yan manomai. Yakât otmâ nâmâ mumbom gârâmâ arinomai yan nâhât hahitne mem ari yan kuri-hineknomai.” Yawu gârâmâ yâkŋe ki biwi yâhâp otmâ sâop.

23 Torokatmâ Mosehât sâwe. Mose âwâŋe mâmâjaŋe Anitâhâlen biwi nângân nângânyetŋaŋe kepeim manowot. Yakât otmâmâ Aihita yengât lok pato, kutŋe Parao sâŋ, yâkŋe yuwu sâop. “Isirae ambolipŋe yengât nanlipyeŋe ŋaŋa ya yongonŋetâ muŋet,” yawu sâop. Yawu sâŋu Mose âwâŋe mâmâjaŋe nanyetŋahât kun kundenŋe ekmutâ âlepŋe otmu Paraohât den ya kum yuwu sâowot. “Nannetŋe yu hâmbâi lok pato otbuap.” Yawu nângâmâmâ nanyetŋe lâum ari âlâengen manmutâ emetsenŋe kalimbu pesuk sâop. Yakât

kakŋan saka saka kâlehen katmutâ to kakŋan yolon yolon otmâ talop. Otmu saka saka kâlehen tatmâ isem tatmu Parao baratŋaŋe toen arim yaŋak mem teteop. Yâkŋe mem tetemâmâ ŋaŋa ya mem ari golemguop.

²⁴ Yawu otmu Moseŋe pato otmâ Aihita yengât lok kunŋe pato otbuap yakât nâŋgâmu gemu pilâyekmâ bukulpŋe yengâlen yâhâpŋe torokatmâ manop. ²⁵ Yâk yengâlen torokatmâ umatŋe topŋe topŋe teteyiŋgiwuap yakât nâŋgâm ki gorâwaŋgiop. ²⁶ Yâhâmâ Anitâŋe pat kuyiŋgiop yakât bulâŋe tetewuap yakât nâŋgâm yâk yengâlen torokatmu orowâk manbi. Otmu Kiristo yamâ Anitâŋe hâŋgângumu ge manmu nâŋgâm bâlewaŋgim âlâlâ otbaŋgiwi dop yawuâk otmâ manop. Yawu manmâ gam Aihita ambolipŋaŋe Anitâ betbaŋgim hâk sânduhân manmâ gawi yâk yengâlen torokatmâ tosa meman sâm kut miop yakât nâŋgâmu tâŋât olop.

²⁷ Yawu otmâ Anitâŋe pat kuyiŋgiop yakât nâŋgâmu bulâŋe olop. Nâŋgâmu yawu otmu Aihita yengât patoyeŋahât kiŋgitŋahât ki otmâ âi ya pilâop. Yawu otmâ yapâ pilâyekmâ lok ki manmaiângen ari manop. Yan manmâ “Anitâ Ambonenŋe ki ekmain yamâ bulâŋanâk tatmap,” yawu nâŋgâm kârikŋeâk manmâ biwi yâhâp ki otmâ manop. ²⁸ Yawu gârâmâ Anitâŋe ekmu ârândânŋ otmu yâk hâŋgângumu purik sâm Aihita hânân âwurem ariop. Yan ari Anitâŋe ikŋe aŋelone âlâ, kutŋe Itit kiom Amboŋe sâm, yâk hâŋgângumu Aihita kapi ambolipŋe yengât nanlipyeŋe kunŋe ya yongomu munomaihât yakât topŋe ekuop.

Ekumu nângâm biwi yâhâp ki olop. Otmu anelo yaņe buku otningiâk sâam yâkât denņe lâum lama gâim hepņe yaņe kâsikum yingimu emetyenahât gahatņan mem lâwâlewi. Yuâmâ inânņanâk Anitâņe Mose den ekuop ya nângâmu bonņe otmu ya watmâ olop.

²⁹ Otmu “Anitâņe den sâop ya bonņe tetewuap,” nângâm Isirae lohimbiņe Aihita hân pilâm saru gulunņe, kutņe Saru Kuriņ sâam, yakât sâtņan ari kinbi. Yan kinņetâ Anitâņe sâamu to ya keterakmâ torehen torehen otmu mâtâp teteop. Yawu otmu kâiyeņe hân liņmâ nombotgen bawi. Nombotgen baņetâ Aihita yeņgât hep bero yâku yawuâk betyeņan watyekmâ bawi. Tânâmņan bam tatņetâ Anitâņe sâamu saru yaņe tuņ sâam gam lâum gulip tuhuyekmu haranyongop.

³⁰ Otmu Anitâņe den ekyongop yakât bonņe tetewuap sâam ya nângâņetâ bulâņe olop. Yawu gârâmâ manbi yaņe kapi âlâ, kutņe Yeriko sâam, yan kasalipyenāņe paņ kârikņe sâhâm yeņe yakât kâlehen tatbi yan takawi. Yan taka Isirae ambolipņane Anitâhât den lâum paņ kârikņe ya hawamgum yâhâm gem tatņetâ hilâm nombolân yâhâp pesuk sâop. Hilâm nombolân yâhâp ya pesuk sâamu yanâk paņ ya aksihâk ge liwarakmâ iop. Yawu otmu Isirae ambolipņane kasalipyene ya yâhâ yongom metewi. ³¹ Yawu otbi. Yâhâ yawu ki otbi yan mâtâp imbi âlâ manop, kutņe yamâ Lahap. Anġoân Isirae lok yâhâp hângânyotgoņetâ emet galemņe ekde sâam yâhâm giowot. Otmu imbi yaņe yuwu nângâop. Isirae ambolipņane ki nohonomai nângâm lok yâhâp

hângânyotgowi ya kapi ambolipņane yelekmai sâmem mem mesanġutyelehop. Imbi yaņe biwi yâhâp ki otmâ mesanġutyelehopġât otmâ yâhâ yongowi sâp yan imbi ya konok hâmeņe kinop. Yawu.

³² O, bukulipne, den sâmune dâiakmâ kâlep otmapġât den pâņe tâlâwâk sâwe. Tâmbâlipnenņe nombotņane Anitâhât den yakât bulâņe tetemu menom nânġâm manmâ gawi ya yengât kutyeņe yuwu. Gition, otmu âlâmâ Barak, âlâmâ Samson, âlâmâ Yepita, otmu âlâmâ Dawiti, âlâmâ Samue, otmu Anitâhât poropetelipņe nombotņe. ³³ Lok yongonsan yuâmâ Anitâņe den sâop ya nânġâņetâ bulâņe olop yakât otmâmâ biwi yâhâp ki otbi. Yawu otmâ kasalipyene yongom itit kiom tuhuyekbi. Yâhâ yâk yengâlen ġâtņe nombotņe yamâ meyekmâ pusi papato sâtņe kârikņe, kutņe laion sâm, ya tatmaiân pilâyekņetâ gewi. Yamâ Anitâņe mâmâņe otyiņgimu mem pâlâmņe tuhuyekņetâ ki neyekbi. ³⁴ Yâhâ nombotņe âlâmâ mem pilâyekņetâ kâlâp kâlehen kionbi. Yamâ ki seyehop. Yâhâ nombotņe âlâmâ kasalipyenņe tenġâen kinbi yakât nânġâm gem kewewetmâ ariwi. ³⁵ Yâhâ naom yâhâp muowot yamâ Anitâņe sâmu yâhâpņe yahatmutâ heroņe otbi. Yâhâ nombotņe âlâmâ kasalipyenņe mem âlâlâ tuhuyekņetâ hâhiwin kakņan manmâ yuwu sâwi. “Âo, hâmbâi sâp patoen mumuņambâ yahatmâ heroņe kakņan manmâ yâhânom. Yakât ki gorâningiâk.” Yawu sâm Anitâhât den ya tâņ tâņâk lâum kinmâ muwi. ³⁶ Nombotņeâmâ kasalipyenņe meyekmâ senyenjan gem yongom mem âlâlâ tuhuyekbi.

Yâhâ nombotņeâmâ tâk kârîkņaje mem sâhâyekbi. Yâhâ nombotņeâmâ lâm kêlehen panyekņetâ ge yaken tatbi. ³⁷ Nombotņe yamâ kasalipyenaje kâtņe yongonjetâ muwi. Nombotņeâmâ seheņe mem pâņ lâu lâu hâreyekbi. Nombotņeâmâ tewetņe engatyene hâum tiņ tâņ meyekbi. Yâhâ nombotņeâmâ kasalipyenaje meyekmai sâm yan hâkyene alitmâ ari hewukņehen mesangurakbi. Nombotņeâmâ sot me senņe âlâlâhât pâinmâ in po manbi. Yawu gârâmâ lohimbi belângen manbiņeâmâ yâk yekmâ mem bâleyekņetâ manbi. ³⁸ Anitâhât kasalipņaje yawu otyiņgiwi. Yawu otyiņgim yâk watyekņetâ gem tiok taok otmâ âlâengen âlâengen ari manbi. Yawu otmâ ari lok ki manmaiângen, me dikin kêlehen, me bârâengen ari yan manmâ gawi.

³⁹ Lohimbi yuņeâmâ Anitâhâlen biwi nâņgân nâņgânyenaje kepeim den sâop yakât nâņgâm biwi yâhâp ki otmâ manmâ gawi. Yakât otmâ yekmu ârândâņ otmu manman kârîkņahât pat kuyiņgiop. ⁴⁰ Yawu gârâmâ Anitâhât lohimbi yaje hionakmâ nombotņaje kulet sâyiņgim yenjiâk bulâņe menomaihât dop ki tap. Yawu nâņgâm pat ya kuyiņgimu nengât tâmbâlipnenņaje manmâ gawi yamâ bonņe ya in yawu ki mewî. Yawu gârâmâ nen orowâhâk manman âlepņan manmâ yâhânom.

12

Anitâņe ikņe nanņe baratņe sâm menenehop.

¹ Bukulipne, yuwu sâmune nâņgâņet. Nengât tâmbâlipnenņaje Anitâhât den nâņgâņetâ bulâņe otmu yâkâlen biwiyenaje kepeim manmâ biwi

yâhâp ki otmâ manmâ gam muwi. Yakât nângâm den âlâen hâum sâmunen nângânet. Tâmbâlipnenjaņe kurâp kinmâ hawamnongom nenekmâ tai yakât yengu yâkņe Anitâhât den lâum ki lohotņe otmâ gawi yanâk torokatmâ mannomai. Manmâ biwiyenņe gemu lohotņe otmaiĥât orotmemeyenņe bâlenņe ya kerehâk bet pilâm hewewenņ otmâ Anitâhât den lâum yâkâlen biwiyenjaņe kepeim manmâ yâhânomai. ² Yawu otmâmâ Yesuņe kerek nengât nângâningim manman bâlenjahât Amboņe, kutņe Satan, yâkât bâtnambâ menenekmâ yâk mem ge kalop. Yakât nângâm Yesuņe heronņe otmâ ki lohotņe olop. Yâkņe hâhiwin kakņan manmâ senņan gewi yakât nângâm sât gum kinmâ hâkņe ki alilahop. Yakât otmâ âwâņe Anitâ yâkât lau lâum manmâ muop. Mum yahatmâ kulet sâningim himbimân yâhâm kunnenņe pato otmâ tap. Otmu âwâņenņe âi sâm waņop ya biwiņenņe tiņâk kepeim manop. Yawu manmâ ki biwi yâhâp olop. Yakât nengu yawuâk yâkât nângâm torokatmâ manmunņe ârândâņ otbuap.

³ Yesu mem âlâlâ tuhunĥetâ yan hâhiwin nângâop. Otmu sâp yiwerenņe yu umatņe topņe topņe teteyiņgiwuap. Umatņe teteyiņgimu Yesuņe olop yakât den pat ya nângâm heņgenņumâmâ biwiyenjaņe ki gewuap. ⁴ Otmu yenņe lohotņe otņetĥât Satanņe perâkņe topņe topņe mem gamap yan ki lohotņe oai. Otmu Anitâhât hâkâņ otmaiņe mem âlâlâ tuhuyekņetâ yan gurâ kârikņeâk mansai. Umatņe kakņan yâhâmu Yesuņe kârihem kinmâ hâhiwin nângâm muop. Umatņe yawuya yenĥât kakyenņan ki yâhâmap. Yakât otmâ yenņe

yâkâlen biwiyeŋaŋe kepeim kârihem manmâ yâhânomai.

⁵⁻⁶ Bukulipne, yuwu sâmunne nâŋgâŋet. Anitâŋe tihitnenŋe otmap yakât nâŋgâm poropete âlâŋe den kulemguop ya yuwu tap.

“Awoŋnenŋe Anitâ yâkŋe tepŋe nâŋgâningimap. Otmu nenŋe otmunŋe bâlemu mâtâp bâleŋan ari hiliwahomaingât yâkŋe kuwiknenekbe sâm hâhiwin ningimap. Hâhiwin ningimu yanâmâ biwi nâŋgân nâŋgânnenŋaŋe keterakmu yâkâlen torokatmâ komot konohâk manmâ yâhânom. Yawu otningimap yakât nâŋgâm Anitâŋe yen kuwikyekmu yeŋe yakât ki hâkâŋ otnomai. Otmu yen kuwikyekbe sâm yawu otyiŋgimu yeŋe biwiyeŋaŋe ki gewuap.”

Den yawu tap. Yakât yu nâŋgâm mem mannomaiân umatŋe topŋe topŋe teteyiŋgimu biwiyeŋaŋe ki orotok sâwuap.

⁷ Yakât yuwu torokatmâ sâmunne nâŋgâŋet. Nan baralipnennŋaŋe den kuŋetâ me otmâ tâpikuŋetâ yanâmâ yongom mem kuwikyekmain. Yakât dopŋeâk Anitâŋe sâmu umatŋe topŋe topŋe teteningimap. Yakât otmâ umatŋe âlâlâ teteyiŋgiwuap yan yuwu nâŋgânomai. “Main, yuâmâ Anitâŋe ikŋe nanŋe baratŋe sâm yakât kuwikneneksap.” Yawu nâŋgâm heronŋe otmâ mannomai. ⁸ Yawu gârâmâ Anitâŋe ki kuwikyekmap mâne yeŋe ikŋe nanŋe baratŋe bia, mandu tâŋât otbâi.

⁹⁻¹⁰ Otmu torokatmâ sâmunne nâŋgâŋet. Awoŋlipyeŋaŋe yongom mem kuwikyekŋetâ yâk

yeŋgât amutgen manmâ denyeye lâum manmâ gamai. Yawu gârâmâ Awonjeŋe himbimân tatmapŋe mem kuwikyekmu yakât gurâ ki hâkâŋ otnomai. Yâkŋe mem kuwikyekmâ gamap yakât bulâŋeâmâ himbimân ikŋe orowâk mannomaihât nâŋgâm yawu otyiŋgimap. ¹¹ Otmu yakât torokatmâ âlâ sâwe. Awonjeŋe Anitâŋe kuwikyekmâ gamap yanâmâ hâhiwin nâŋgâm tep bâle otnomai. Yâhâ hâmbâi orotmemeyeŋe bâleŋe yu pilâm ikŋe orowâk manman sânduhân manmâ yâhânomai.

Bulâŋe mem tâpikgumain sâm biwinenŋe alilaŋgim buku oraŋginom.

¹²⁻¹³ Yawu gârâmâ yeŋe ki ihilâk mahilâk mannomai. Yeŋe manmanyeye ya heŋgeŋgum mâtâp tâŋ tâŋâk watmâ arinomai. Yeŋe yawu otmâ manŋetâ yeŋgâlen gâtŋe âlâ me âlâ biwi yâhâp otmâ mansaiŋe otmâ tâpikgumai ya pilâm yeŋgâlen torokatnomai. Yawu otmâ yeŋe biwi konohâk otmâ mannomai. ¹⁴⁻¹⁵ Otmu hioŋakmâ yeŋgâlen gâtŋe âlâ me âlâŋe Anitâŋe pat kuyiŋgiop yâk betbaŋgim yakât bulâŋe mem tâpikgum hiliwahomaihât yen lohimbi kerehâk biwiyeŋe alilaŋgim buku oraŋginomai. Otmu yâk orowâk manmâ yâhânom yakât biwiyeŋe yâkâlen kinbuap. Otmu yakât den âlâ sâwe. Bau ŋasiŋe yaŋe hâreakmâ sânduk sâm ârândâŋ otmâ bau mem bâlemap yakât dopŋeâk yeŋgâlen gâtŋe âlâ me âlâŋe otmâ tâpikgum mem bâleyekmahât galemahom mannomai.

¹⁶ Nen Esauhât den pat ya naŋgain. Âwâŋeŋe bâtŋe bâiŋe ya membuap sâm yâkât pat kuwaŋgiop

yakât nângâmu tâñât otmu hâkân olop. Yawu otmâ sotgât nângâm imiñe ulitgumu imiñe sot wañmu niop. Nem yan âwâyetñahât bâtnje bâiñe ya imiñe wañop.

17 Yâkñe otmâ tâpikguop yakât kakñan yâhâpñe otmune tetewuap mâne yakât pâinmu biatmu hâum pâpgum imbiâk iwi tepñe kârâm biwiñe ñasin otmu iseop. Yawu otmâ mâtâp ya mem tetewuapgât dop ya ki ehop. Yakât pat ya nângâmain. Otmu yengâlen gâtñe âlâ me âlâñe yâkñe olop yawuâk otmâ Anitâñe pat kuyiñgiop yakât nângâñetâ gemu Anitâ betgumai sâm yakât galemahom mannomai.

18-19 Emelâk embâñân tâmbâlipnenñe manbi otmu yiwerenñe nenñe mansain yukât topñe teteâkgât yuwu sâmune nângâñet. Tâmbâlipnenñe Aihita hân yapâ pilâm taka pumñe âlâ, kutñe Sinai sâm, yan tatbi. Yan taka tatñetâ Anitâñe girem den Mose ekuwe sâm otmu yanâk mun pato pilâop. Lâmun isemap yakât munñe ya wangim pilâop. Otmu sâp yanâk elem pato miop. Yanâk kâlâp semu utun pato sahakmu omonguop. Otmu belek sâmu himbim guñguruñ sâop. Yawu otmâ mun pato pilâop yan Anitâñe yuwu sâop. “Lohimbi, me songo bau, me âlâ me âlâñe pumñe yukât gotñan ganomai yamâ kâtñe yongonjetâ munomai.” Yawu sâop. 20-21 Yawu sâmu Mosenñe pârâk pilâm kâi bâtnje sânsân sâmu yuwu sâop. “Main, nâ kiñgitnahât dondâ oan.” Yawu sâop. Sâmu Isirae lohimbi nombotñe yâk orop kinbiñe mun pato ya nângâm yâku yawuâk kiñgityenñahât otmâ hân mem tep mem asim ahom ahom otbi. Yawu otmâ yuwu

sâwi. “Âo, Anitâ. Kulem yu topņe âlâ tetemu ekmâ kâi bât sânsân oain. Yakât nenņe gâ orop wuân me wuângât alahunomgât dop ki oap.” Yawu sâwi.

²² Yawu gârâmâ Anitâņe tatmâ gaop. Otmu tatmâ yâhâwiop. Yâkņe yen orop yawu ki otningimap. Yâhâ pumņe âlâ, kutņe Sion sâm, yakât dopņeâk Anitâņe himbimân tatmap, yan arinom. Otmu aņelo komotņe komotņe yaņeâmâ yâk hawangum heroņe otbaņgim mepaemai. Otmu nen gurâ yawuâk yâk yengâlen torokatmâ mepaenom. ²³ Otmu emelâk lohimbî nombotņe Yesuhâlen torokatbî yâhâmâ ikņe pat kuyiņgim kutyeņe kulemgumu tap. Lohimbî ya yengâlen arinom. Emelâk tâmbâlipnenņe nombotņe Anitâhâlen biwiyeņe kepeim manmâ muwi. Yâkņe kulet sâningim Anitâ gotņan tai. Yawu gârâmâ lohimbî emelâk meyhêp otmu nen mansain yu, nen kerek sâp patoen menduhunenekbuap. Yawu otmâ topnenņe ekmâ nâņgâm hâmeņe ikņiâk ikņiâk ningiwuap. ²⁴ Yawu gârâmâ lok âlâhâlen hâum sâwe. Lok âlâ, kutņe Awe sâm, yâhâmâ ataņe kumu muop. Yakât matņeâmâ Anitâņe ataņe ya kâpekbangiop. Yawu gârâmâ nengât sâm Yesu kuņetâ mumu hepņe giop. Yakât bonņeâmâ nenņe yâk orop torokatmâ manmâ yâhânomgât mâtâp âiņe meningiop. Yawu gârâmâ Anitâņe mem dâinenekmâ gamu yakât ki hâkâņ otnom.

²⁵ Yâhâ topnenņe teteâkgât den âlâ yuwu torokatmâ sâmunê nâņgâņet. Anitâņe girem den Mose ekuop yanâmâ lok nombotņe den ya nâņgâņetâ gemu bet pilâwi. Yakât kakņan

yâkņe sâmu yakât matņe umatņe teteyiņgimu manmanyeņe bâleop. Yawu gârâmâ sâp patoen nenņe otbin mewin yakât matņe Anitâņe mem purik pilâningiwuap. Yakât otmâ nanņe Yesu hâņgângumu ge den topņe eknongop ya nâņgâm tiņâk lâum manmâ yâhânom. ²⁶ Emelâk embâņân Anitâņe Sinai pumņan Mose den ekuop yanâmâ hân sânsân sâop. Ya pesuk sâmu yanâmâ yuwu sâm ekuop. “Nâņe sâmune hân yu sânsân yap. Yâhâ sâp pesuk sâwuawân âlâkuâk sâmune hân himbim yuâmâ huhuakmâ biatmâ metewuap. Otmu emetsenņe pitu topņe topņe ya pek sâm gulip otmâ metewuap.” Yawu sâop. ²⁷ Anitâņe den sâop yukât topņeâmâ yuwu. Yâkņe sâmu hân, himbim, emetsenņe, pitu topņe topņe âlâlâ yu gulip otmâ metewuap. Yakât kakņanâmâ ikņe manmanņanak tetewuap. Sâp yanâmâ Anitâņe nengât pat kuningiop yakât bulâņe ningiwuap.

²⁸⁻²⁹ Anitâņe nengât sâm manman kârikņahât pat kuningiop yakât bulâņe menom. Yakât otmâ yâk mepaem manmâ yâhânom. Yawu gârâmâ lohimbi nombotņe Anitâhât den nâņgâņetâ gemu bet pilâmai ya yeņgât topyeņe teteâkgât den âlâen hâum sâwe. Âliwahap haraņ haraņ sâm emetņe mem tatmap yan kâlâp saum katmunņe semu gâwuņanak kinmap. Dop yawuâk Anitâņe sâmu âlâlâ ya sem gulip tuhumu kouņanak kinbuap. Yawu gârâmâ Anitâņe nen buku otingiâkgât yâk mepaem heroņe otbaņgim mannom.

13

Yuwu otmâ manmunņe Anitâņe nenekmu

ârândâŋ otbuap.

¹ Orotmeme âlepŋe girawu tap yakât ekyongomune nâŋgâŋet. Yeŋe angoân buku oraŋgiminiwi ya yawuâk torokatmâ buku oraŋgim mannomai. ² Embâŋân angoânâmâ aneloŋe lok hâtŋum takanjetâ lokŋe mem buku tuhuyekbi. Yawu gârâmâ lomba nombotŋe yeŋgâlen takanjetâ dâim yâhâ emelan katyekmâ sot um yiŋginomai. ³ Otmu yeŋgâlen gâtŋe nombotŋe mem pâi emetŋan katyekŋetâ tatmâ hâhiwin nâŋgâmai yakât pâi emetŋan taiâk sâam ki gulip malap otnomai. Nenŋe nenŋahâk pâi emetŋan tain mâne girawu otbâinâ nâŋgâm yâk yeŋgât nâŋgânomai. Otmu yeŋgâlen gâtŋe nombotŋe yamâ lohimbî belâŋen mansaiŋe mem bâleyekŋetâ hâhiwin kakŋan mansai. Otmu yen yawu otyiŋŋiŋetâ mansai mâne girawu otbâi yakât yâk nâŋgâyiŋginomai. Yenâmâ Yesuhât komot konohâk mansai yakât otmâ yeŋe hewewenâk yâk tânyongonomai.

⁴ Otmu den âlâ sâamune nâŋgâŋet. Lohimbî sihan mansaiŋe konda otŋetâ Anitâŋe ya ekmu dondâ bâlemap. Otmu lokŋe imbiŋe miakmâ manmutâ ârândâŋ otmap. Yâhâ yakât kakŋan lok me imbi ondop orop manmai ya Anitâŋe ekmu dondâ bâlemap. Lohimbî yawu otmai yaŋe tosa umatŋe memai. Yakât hâmbâi Anitâŋe matŋe ya tâŋ tâŋâk yiŋgiwuap.

⁵ Emelâk Anitâŋe Mose den ekumu kulempuop ya yuwu tap.

“Nâhâtŋe ki tihit otningimap sâam gorâyiŋgimu enŋat yâhâp ki otnomai. Ki pilâyekmune umburuk mannomai.”

Yawu sâop yakât otmâ wahap yu me ya tatningiap ya ekmunje ki dopņan otmu ki de-waenom. Otmu dopnenņan tatningiwuap ya wangim ningiâkgât sâm ki ulitgunom. Bia kârikņe. Wuân me wuân tatningiap yamâ dopnenņan.
⁶ Anitâņe den sâop yakât topņe nâņgâm yuwu alahum mannom.

“Kutdânenņane haonmâ ârândâņ tihitnenņe otmap. Yakât otmâ lok bâleņane mem bâlenenekne sâm otnomai yanâmâ nenņe yâkât wâtņan kinmâ mâtâpgât ki hâum pâpgunom. Yâhâ yawu otninginomai yan nenņe yakât ki gorâningiwuap. Yawu sâm alahum yâkât wâtņan mannom.”

⁷ Emelâk papatolipyenņe Anitâhâlen biwi nâņgân nâņgânyenņe kepeim yâkât den ekyongominiwi. Yawu otmâ manmâ ki lohotņe otmâ gam muwi. Otmu yengu yâkņe otminiwi yawuâk otmâ Yesu Kiristohâlen biwi nâņgân nâņgânyenņe kepeim ki lohotņe otmâ mannomai.
⁸ Emelâk Yesu Kiristoņe tatmâ gaop, âun yu tap, otmu yawuâk tatmâ yâhâwiop kârikņe. Yakât otmâ ki gorâningiwuap.

⁹ Yawu gârâmâ lok nombotņane yengâlen taka den ango ekyongowi yakât den pat buku nombotņane eknohoņetâ nâņgâwan. Den ekyongowi ya nâņgâņetâ biwi nâņgân nâņgânyenņe gulip malap otmu Yesu Kiristohât mâtâp tâpigumaihât yuwu sâmune nâņgâņet. Den yamâ tâņât. Yakât otmâ yâkņe den ekyongowi yamâ ki lâunomai. Yeņe den tâņât me orotmeme bâleņe ya pilâmâmâ Anitâņe tep âlep nâņgâyiņgim tihityeņe otmap ya nâņgâm

hengeḡum biwiyenḡe yâkâlenâk tatbuap. Yawu otmâ manḡetâ yâkḡe mâmâḡe otningim yâhâwuap.

¹⁰⁻¹¹ Yâhâ Anitâḡe lohimbi kerek yengât tosa pilâyinḡiâk sâm hotom uminiwi ya yengât kunyenḡe yuwu otminiop. Yâkḡe selep belângen kinminiop yan lama kum gâim yanâmâ hepḡe mem yâhâ alata kakḡan hepḡe tuḡḡuminiop. Yawu otmu bukulipḡe nombotḡe yanḡeâmâ belângen kinmâ bonḡe yamâ mem uḡetâ sem biatminiop. ¹² Otmu dop yawuâk nenḡe Kiristohâlen biwinenḡe kepeim yâkât pat otnehât yâk mem kapi betḡehen ge kuḡetâ mumu hepḡe giop. ¹³ Yakât otmâ nenḡe hotom um katmai yakât nâḡḡâmunḡe gemu selep hânḡiḡan yan ki yâhânom. Ya pilâm belângen tatmâ Yesuhâlen torokatmâ yâkât denḡe lâum mannom. Yawu otmunḡe yanâmâ Yesu otbaḡḡiwi yawuâk nen otninginomai. Otmu yakât ki gorâningiwuap. ¹⁴ Nenâmâ kapinenḡe yu bia. Kapinenḡe dondâḡe yamâ himbimân Anitâ tatmap ewan tap. ¹⁵ Otmu Kutdânḡe Yesu yâkḡe kulet sâningim himbimân ewan yâhâ tap. Yakât otmâ nenḡeâmâ yakât nâḡḡâm Ambonenḡe Anitâ herḡe nâḡḡâwânḡim mepaenom. ¹⁶ Otmu orotmemenenḡe âlepḡe otmunḡe Anitâḡe nenekmu ârândâḡ otmap yakât sâwe. Lohimbi nombotḡe umburuk manmaihât yenḡeâmâ yâk nembe kalem otyinḡinomai. Otmu nombotḡe hâhiwin kakḡan mansai buku otyinḡim tânyongonomai. Orotmeme yawu otmâ mannomai yanâmâ Anitâḡe yekmu ârândâḡ otbuap.

¹⁷ Otmu papatolipyenḡe yengât yuwu sâmune

nângâñet. Yen manman kârikñahât mâtâp hâum pâpgumaihât yâkñe yeñgât galem otmâ galemyongom mansai. Otmu yâkñe Anitâñe âi sâm yingiop ya biwiyenñe tinâk kepeim mem mansai. Hâmbâi sâp patoen yakât hâmenñe yingimu menomai. Yawu gârâmâ biwi nângân nângânyenñe gemapgât yeñe yâk yeñgât amutgen manmâ tem lâuyinginomai. Tem lâuyingim manñetâmâ yâkñe biwiyenñe hewewenñ otmu galemyongom henñenñgunomai.

¹⁸⁻¹⁹ Otmu nâñe bukulpne orowâk tatmâ Anitâhât tem lâuwanñim manmâ orotmeme âlepñe otmâ manmunñe nenekmu ârândân oap. Yawu gârâmâ yeñe biwi nângân nângânyenñe hewewenñ otmu nengât sâm Anitâ ulitgum mannomai. Otmu Anitâñe nâ hângânnohomu yeñgâlen takawehât gurâ yawuâk ulitgum manñetgât nanñan.

Den bâiñe

²⁰ Bukulpne, den bâiñe ekyongomune nângâñet. Kutdânenñe Yesu, yâkñe mumu yan Anitâñe tosanenñe pilâningim manman kârikñahât pat kuningiop. Otmu âwâñe Anitâñe mumuñambâ mem yahalop. Yawu otmâ pat kuningiop yakât bulâñe hâmbâi menomgât mâtâpñe teteop. Ya biatbuapgât dop âlâ ki tap. ²¹ Bulâñe ya mene sâm Anitâñe mâmâñe otyingimu yâkât wâtñan kinmâ tem lâuwanñim manñetâ nângâmu ârândân otbuap. Yawu otmu yanâmâ biwi nângân nângânyenñe huruñ sâmu mannomai. Otmu Yesu Kiristo mepaenomai. Ya bonñanâk.

²² Bukulpne, yeñe biwiyenñe gemapgât den tâlâwâk yu kulemgum katyingian. Yawu gârâmâ

yeŋe sâlikumâmâ topŋe ya nâŋgâm heŋgeŋgeŋet.
²³ Otmu tembe lâu pâi emetŋe galemŋe tatmapŋe
nâŋgâmu Timoteo ya pâi emetŋambâ ge mansap.
Yâkât den pat yawu sâŋetâ nâŋgâwan. Yawu
gârâmâ yâkŋe taka nâ penenihimu yanâmâ netŋe
orowâk yeŋgâlen takarom.

²⁴ Otmu yeŋe pepa yu sâlikum nâŋgâm yengu pa-
patolipyeŋe otmu Yesuhât komot mansai ya nâhât
den pat yu ekyongom buku otyiŋginomai. Otmu
Itali ambolipŋe lohimbi tohoŋetâ mansain yâkŋe
yeŋgât tep âlep pato nâŋgâyŋim mansai. Yâkŋe
yawu nâŋgâyŋim mansai yakât yeŋe nâŋgâŋetgât
nâŋe den pat yu kulemgum katyiŋgian. ²⁵ Anitâŋe
tihityeŋe olâkgât nâŋe haonmâ ârândân ulitguman.
Den pat katsan yu yuâk.

Yesuât Den Pat Âlepŋe
The New Testament in the Selepet Language of Papua
New Guinea
Nupela Testamen long tokples Selepet long Niugini

copyright © 1986 Wycliffe Bible Translators, Inc.

Language: Selepet

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 22 Feb 2024 from source files dated 31 Aug 2023

995083d2-705e-5a60-af47-1e36806ccbc